

臨

卷九十一至九十五
外制

牧齋初學集卷第九十一

外制一 并序

外制集序

前代學士院掌內制舍人院掌外制國朝兩制皆屬翰林設中書科就翰林承草登軸而已

太祖嘗言翰林鮮人制誥多自作今內閣尚有存者詞意諄重足以仰見 聖祖審慎職司儆勵臣工之至意 成祖始掄七人入內閣備顧問兼司兩制 孝宗時李文正公以侍郎入閣

專管誥勅嗣是皆以尚書或侍郎兼閣學專管

可謂極重矣然文正諸公文集皆刊落制詞不載或謂綸綍尊嚴不當錯置別集或謂館閣隆重無暇簡點文字理或然也正統以後迄於正德簡牘相沿郎吏胥史可以按籍繕寫王言遂爲故紙而代言之任日輕嘉靖中天子雅意右文每與相臣言祖宗任翰林故事推舉翰林春坊官入管誥勅於是瞿文懿高文襄之流訓辭爾雅彬彬可觀久之而增華加厲鋪張藻飾予取予求無復體要代言之任重而王言則未嘗不輕萬曆初江陵特疏駁正以君諂其臣

爲譏申飭嚴厲而迄未能止也天啓元年少師高陽公以宮庶領外制初爲嚴切典重之文援摅職掌諄復訓誡闡潛德章壺儀鄉里婦孺纖芥畢舉於是制誥之體粲然一變余以史官承乏從公之後大端皆取法於公而參酌質文規撫唐宋則竊有微指焉余謝事不及十年而制誥之文又再變矣嘗哀不云乎其文流則失正其詞質則不麗夫質而不麗非吾之所逮及也近代之流而失正者有二抽黃對白肥皮厚肉其失也靡標新豎異牛鬼蛇神其失也纖靡之

與織其受病於卑俗則一也然而世之病之者則寡矣嗟夫以余之老於史局在著作之庭又幸附通儒元老之後塵不能洗心轉力明綸旨之典要定後作之章程而所謂流而失正者在後於余者乃滋甚豈余之不肖不能障狂瀾而東之顧反爲之掘泥而揚其波乎權載之曰使盛聖之文明不登於典謨訓誥罪在菲薄余誠無所逃罪也矣歸田多暇發嚮所作制草而閱之顏面墳赤愧汗交下錄爲十卷櫝而藏之且略述代言沿革升降之槩以叙于首閒一省視

庶可以知余之有罪而長遺恨於斯文也崇禎

十五年十二月十六日嘗熟錢謙益序

皇后冊文

掌外制日恭撰

維天啓元年歲次辛酉四月壬申朔二十八日

巳亥皇帝制曰朕嗣服守成側身思永繼

兩朝億萬年之令緒在余一人奉二祖十

一宗之享嘗惟末小子言念基圖之重敢謀宮

室之安乃左右弼臣宗伯副貳暨大夫宗婦道

揚末命祈協神民咸曰眇躬不可以不承中宮

不可以無主仰稽俯詢先志後占擇建賢明宣

理陰教若時元吉正位黃中國有故嘗余敢弗
率咨爾張氏博厚配地淑哲倪天上應張星主
太廟明堂之位下臨角亢叶后宮軒轅之占文
定厥祥天作之合嘉典大備 祖考有聞乃特
遣使持節以金冊金寶立爾爲皇后於戲閔三
年在疚之時思三日嗣親之禮母儀不遠遯遺
範于 兩宮內治惟艱攸我將于 九廟惟爾
之贊奏予治效關睢之進賢惟天之右序予家
篤螽斯之衍慶服我彝訓惟乃之休

太子太保戶部尚書兼文淵閣大學

士劉一燝授光祿大夫

制曰朕嗣守基圖祇承鼎革受遺緒于 祖考
闕我成功念嗣德于眇躬惟予報誥永言顧命
曰有蓋臣深惟弘濟之艱敢後勤勞之獎式涓
穀旦播告路朝具官劉一燝四氣均和五行鍾
秀學足以謀王體而斷國論材足以亮邦采而
熙天功綿歷禁塗休有譽處暨茲登用自我
先皇甫膺恤宅之知遽道憑几之命保全涼昧
奠此危疑祕殿應門力捧繼離之日高文典冊
載宣重巽之風雖參預機務之閒實首任安危

之寄在昔周家綴衣之命太保俾爰以及宋室
撤簾之功上公定策肆我陪輔奮爲宗功自非
謀國而後身孰能沉幾而先物矧余垂拱之日
尤資輔弼之臣若占筮以決疑賴屋楹而任重
是用參華槐位晉陟鼎司重以訓辭著之冊府
特授爾階光祿大夫錫之誥命於戲天子王矣
爾將稽首以颺言股肱良哉余乃敷心而歷告
閔一人之在廟恤我無疆答二后于在天暨
其有比有嘗德而立武事正朝廷以正百官永
承于休往篤爾烈

妻徐氏贈一品夫人

制曰夫婦之義比於君臣艱難懃瘁以相成而
死生契闊以相卹今吾陪輔宣力王家漏澤下
泉及爾同室循念終始良用愾然具官劉一燦
妻累贈夫人某氏教成師氏歸于德門有雞鳴
儆戒之心有葛覃澣濯之德命之不永中道棄
捐當綸扉夙夜之時遡蓬華辛勤之日絲麻管
蒯睠彼勞人黽勉有無有懷國恤心之憂矣何
以告之茲加贈爲一品夫人我有寵章賁其終
始尚爲觀于家國亦有聞于冊書

會祖廷章贈光祿大夫太子太保戶部尚書兼文淵閣大學士

制日記曰天降時雨山川出雲維嶽降神生甫及申古之人崇重輔相之臣原本于神天而歸功于五嶽若此其極也又况于其會祖王父淵源自出者乎劉某乃具官某之會祖父潛于丘園躬有善行劬躬燾後再世而顯至于會孫作吾良弼鼎革之際忠勳茂著余曰惟乃會祖王父佑啓後人若泰山之出雲雨若五嶽之降神靈原深祉厚不可以不顯是用特贈具階官於

戲袞衣繡裳有事家廟其致朕命詔于有神爾祖爾思可以教忠來享來覲可以觀德於戲休哉

會祖母陳氏贈一品夫人

制曰迺者卽位改元盼布恩賚均慶方夏漏澤泉壤所以勸臣勞而敦孝治也矧予良弼逮受顧命自祖以上內外媿德其可忘哉某氏乃具官某之會祖母儀法在躬作嬪令族陰教純備含德弗耀用能使其後昆丞弼我國家以有聞于世淵源深長肆余寵嘉之茲特贈爲一品夫

人於戲鄉里婦孺晦昧百年翟弗副筭詔于幽
窆國恩至是可謂隆矣惟爾其服享哉

祖士沃累贈資政大夫禮部尚書兼
東閣大學士加贈光祿大夫太子太
保戶部尚書兼文淵閣大學士

制曰昔楊袁二氏爲東京名族德業相繼史傳
稱之然其祖父或以歐陽尚書教授鄉里或以
孟氏易起家爲今世學所開必有其自或原或
委豈偶然之故哉累贈具官某乃具官某之祖
父經明行修夙夜強學一畝之宮終焉以老畜

積演迤遺經粲然及子而顯至孫而大肆吾輔
臣被服舊德紬書載筆宣力政府一經之詒百
歲之樹光華蕃衍顧不休與是用加贈具階官
服我休命益大爾家無俾楊袁專美于漢

祖母何氏加贈一品夫人

制曰爲吾政事之臣所以崇大其祖先者備矣
惟將相能致備物家廟有嚴宗祖具享而于王
母無所加命烝昇之義何以上及于祖妣也哉
累贈夫人某氏乃具官某之祖母恭儉肅祇寬
仁慈惠克媿君子以昌厥後山澤氣合而百物

以生律呂位同而五聲叶應再世之後莫之與
京和鳴鏘鏘發祥有自茲加贈爲一品夫人饋
享用加典禮爲稱尚其幽窆知享此榮

父曰材原任陝西布政使司左布政
使累贈資政大夫禮部尚書兼東閣
大學士加贈光祿大夫太子太保戶
部尚書兼文淵閣大學士

制曰人才之生必有原本如採珠玉以供服御
如植杞梓以備器用國旣養之累朝而家亦培
之奕世今吾元臣曰惟舊德名德重光保世滋

大推本所自余用歎嘉原任具官累贈具官某
乃具官某之父風操廉辨訂謨經遠執持之節
著于郎署馳驅之略效于邊陲而命不永年位
不償德篤生三子蔚爲民譽肆我陪輔遂秉國
成朕毗倚顧命之老成循覽國家之故事爲榱
爲棟胥本一木之材若梓若漆咸預百年之用
睠惟堂構之崇高追溯淵源之深長是用加贈
具階官於戲遡設官之初意內外咸正中書稽
加命之舊章公孤皆繇歷考追以命汝用嘉有
子傳之史冊惟良顯哉

母楊氏加贈一品夫人

制曰朕嗣大曆服得名世之士以保余于多艱
余嘉乃績考次其家世於稽其內則母儀艱難
勤苦可以觀感余愾然念之贈夫人某氏乃具
官某之母言有物則行應圖史相夫子于盛年
則冰蘖有聞撫諸孤于稚弱則荼苦無間恒其
貞德終爲母師肆我蓋臣弼余初服惟此泣涕
受遺之日何異號呼誓死之時旋觀屯難之餘
尚識艱貞之自茲加贈爲一品夫人昭我管彤
著于國史庶幾令名與子俱傳于天下

太子太保戶部尚書兼文淵閣大學士韓爌授光祿大夫

制曰惟上天之降割闕我成功惟勸相之有人
保予冲子昔者宅憂翼室周王垂荅拜之文定
策兩朝宋代厚元勳之報闕余小忠之始無競
惟人肆我大賚之恩若古有訓載蠲剛日敢告
治廷具官某道亞黃中文稱白賁世家有舊勵
王臣之匪躬王國克生應天民之先覺飛華夷
路爲文學侍從之臣抗志丘園蹈易退難進之
節出處一致望實兼優迺平進于詹端遂擢叅

乎揆席念 先皇仍几之託夙夜在公當眇躬
受同之初疑丞不貳推同心而調鼎允叶規隨
若昆命于元龜相資謀斷毅然懷體國之色彌
予一人俞哉有讓德之風閒于兩社朕用嘉止
特乃之休是用晉秩地官游登宮保仍兼祕閣
之直對司魁柄之尊特授爾階光祿大夫錫之
誥命於戲以嗣服之多艱屬邊陲之有警內以
又安百姓外以鎮撫四夷若澆之領度支北軍
爲之氣壯若琦之任經略西賊于焉膽寒體一人
席之思雪四郊多壘之恥無荒朕命永世有辭

妻楊氏加贈一品夫人

制曰夫婦之義比于君臣國有夾介之勞瞻惟
舊德家有賢明之助無間死生具官某妻累贈
夫人某氏蔭藉高華操持難肅奉元臣之家教
故環珮有嘗聲習夫子之聞儀故珩璜有茂矩
擬箴圖于七誡蔚矣管彤佐膏火于三餘居然
賓友大命不淑德音未存茲加贈爲一品夫人
於戲媿美大家之風沒而不朽正名小君之禮
死其有知

繼妻楊氏加封一品夫人

制曰人臣之事其君也有坤道焉女子之事其夫也有相道焉蓋無成有終德本相叶而疏榮從貴禮亦交并具官某繼妻累封夫人某氏禮含文嘉則成巽順應歸妹其娣之吉尸有齊季女之賢相我元臣叶于令德負屏儆戒在于戈逆子之時脫珥辛勤爲吐哺進賢之助宜有便蕃之錫以垂燕譽之光茲加封爲一品夫人於戲爾熾爾昌咸有大君之命不求不忮允爲小君之儀

曾祖霽贈光祿大夫太子太保戶部

尚書兼文淵閣大學士

制曰宋制不云乎古之君子有種德于百年之前而待報于數世之後者此爲司馬光之曾祖言之也有宋丞弼之家褒顯其上世者多矣而司馬氏獨著豈非以其人之故哉韓某乃具官某之曾祖父孝友純備文質渾全如山川之出雲不見其跡如珠玉之利物莫言其功天不我欺三世而顯作我陪輔實惟曾孫是用特贈具階官於戲爾尚佑爾孫子記于功宗母俾司馬專美有宋爾從與享其未艾哉

前會祖母蕭氏贈一品夫人

制曰宗廟之數諸侯以五今吾大臣追命及其三世蓋不惟丘園之責得以有聞而閨門微賤之德亦茂著焉此或古制所未逮也某氏乃具官某之前會祖母儀法夙嫻綺紈不御處家人而口無評語憂宗祀而目以喪明德孰懋焉人無知者惟聞孫作我良弼故積慶著于後昆誰知婦孺之沒身乃有休光于長夜茲特贈爲一品夫人惟靈在幽尚克膺此

會祖母郭氏贈一品夫人

制曰爲吾股肱之臣所以上逮三世而賁及其閨門者可謂至矣乃其發祥所自如水木之有本源報必有初豈可忘哉某氏乃具官某之會祖母組紉告虔賓祭祇飭以弗無子是徵禠祀之祥施于會孫式啓功宗之望於戲億之三子咸秉國成琦之再世繼參大政眷惟昭代亦有世臣自非韓姑之相攸疇與纘戎而受命茲特贈爲一品夫人服我休命益大爾家

祖玻先贈資政大夫禮部尚書兼東閣大學士加贈光祿大夫太子太保

戶部尚書兼文淵閣大學士

制曰詩有之韓侯受命纘戎祖考古之人主錫命于其臣未有不追崇其先德者也今吾輔臣曰惟韓氏無念爾祖肆予寵嘉之累贈具官某乃具官某之祖父居身有孝友之實行已在儒俠之間藝黍稷以力田克盡敷菑之事牽車牛而服賈用爲洗腆之資市義有年種德滋茂啓箕裘于再世蔚爾耿光叶隆棟于三公作予毗倚是用加贈具階官於戲旌旄棨戟進有錫于在朝袞衣繡裳退有事于家廟用繼有倬之命

以彰率祖之休詔于有神尚克享哉

祖母薛氏加贈一品夫人

制曰古之烈婦著在史冊然或以毀容截髮爲節或以劬躬燾後爲能名節有遺風規不朽累贈夫人某氏乃具官某之祖母相夫而黽勉蚤歲自誓而凜冽盛年如松柏之有心矢冰霜而爲質求忠臣于孝翼子及孫以婦道爲臣自家刑國肆予良弼惟爾聞孫憑几受遺顧託有同於六尺匪躬事主堅貞何異於兩髦爰有成勞睠茲苦節茲加贈爲一品夫人於戲哀榮被於

三世固申勸於明綸忠義萃於一門尚有聞於
青史

父楫中議大夫原任通政司右通政
先贈資政大夫禮部尚書兼東閣大
學士加贈光祿大夫太子太保戶部
尚書兼文淵閣大學士

制曰朕循覽祖宗之遺迹永懷慶曆之人才得
士不減於武宣儲材必裕乎梓漆是以譬之喬
木蔚爲世臣取諸一家之中遂爲百年之用推
本所自良用歎嘉原任具官累贈具官某乃具

官某之父飛華翰苑抗論諫垣當先朝革鼎之
時直羣相沸羹之會孤行一意惟知砥節而首
公楮柱衆言不屑市名而避怨雖游登於卿貳
終偃蹇於功名彊諫不忘知臧孫之有後見過
能隱宜韓氏之多賢緬思弘濟之艱難益念箕
裘之綿邈拮据於內安外攘本拾遺禁闈之極
思耆定於主少國疑慰持忠入地之遺蓋是用
加贈具階官於戲保予冲子用對越於先皇
其惟哲人亦有光於乃考爾尚格有家之享余
益勤世德之求

前母傅氏加贈一品夫人

制曰朕顧瞻長樂眷念兩宮嘉與庶工共追本始惟我丞弼若時登庸錫類必有所先而移孝亦有自始朕蓋尤穆然思之累贈夫人某氏乃具官某之前母育德名家作嬪良士寒燈宿火輔德業於夕郎永夜視星資儆戒於辰告命之不淑中道弃捐豈知追命之榮乃在後生之子於戲情不親於毛裏豈云執器而悲教不逮於機絲亦已列鼎而祭先河而後海著先王追遠之仁木本而水原遡再世發祥之慶茲加贈

爲一品夫人於戲無德不報固明貴我愍綸有開必先尚幽贊予良弼

母祁氏加贈一品夫人

制曰朕聞善稟於親行成於內徙鄰斷織母儀有聞况爲吾疑丞之臣本諸聖善之訓徽華生播儀範歿遺者與累封夫人祁氏乃具官某之母淑慎其身柔嘉維則恭儉信順以相其夫嚴翼慈和以成其子使朕得名世之士而國有弘濟之臣共秉國成庶幾樞軸相資之教豈不夙夜尚遺寢門治業之思賁之簡書昭於彤管茲

加贈爲一品夫人於戲肩輿上殿雖不及儀灋於六宮錫命下泉亦何美起居於八座靈其不昧服此殊休

詹事府少詹事兼翰林院侍讀學士
孫承宗授中憲大夫

制曰朕觀古先哲王求助訪落咨於在廟其於以夙夜就將示我德行若此其急也余末小子永言繼序惟一二道德博聞之儒左右輔德余曷敢後具官孫承宗裕和而肅又醇厚而高明學通今古之淵源有倫有要識際天人之精稯

惟幾惟深禁苑桂坊回翔滋久代言造士禪益弘多及儲端晉陟之時政講席登延之日爾乃齋戒其德拜自獻其先資堯舜爲君恒道揚夫末命巍然山立羽儀茂著於殿廷偁爾昌言獻納發皇其聞臭粵余明目達聰之漸惟爾啓心沃心之能乃以覃恩授爾階中憲大夫錫之誥命於戲以多難之未堪而紹庭之不易自貽哲命若人子之初生以養聖功曰童蒙之求我余祇求納誨於朝夕人咸責君德於經筵尚無替於辰猷終有辭於永世

妻王氏加贈恭人

制曰人臣翔集禁陛譽處清班雖閱歷高華而被服儒素其閨門相貳亦旣勤矣况又有生死之感乎朕深念之具官某妻贈宜人某氏躬女圖之淑茂秉陰教之肅雍媿德令人如珪璋之作合御窮沒世終荆布以爲儀迨禁近之升華已棄捐於宿草藤麻曉直未忘昧旦之規鈴索夜闌尚想何其之間肆余贊冊賁爾下泉茲加贈爲恭人默襄變稷之猷尚正名於大國茂啓高陽之胤載申命於九原

父麟先贈奉政大夫左春坊左庶子兼翰林院侍讀加贈中憲大夫詹事府少詹事兼翰林院侍讀學士

制曰古稱燕趙多感慨悲歌之士今其遺民猶有存乎其或慨有大志篤生異才權奇不偶於身而風氣鬱開於後余有寵告想見其人累贈具官某乃具官某之父負果毅之姿稟尊嚴之氣礫若多節默表大厦之材居然晚成弗示良工之朴家庭榮交讓之木蔚彼仁風里社成不言之蹊瞿然顧化託深心於文酒俛仰千秋敦

宿好於詩書丹鉛一室惟而才子爲我寶臣元
氣昆侖充無欲害人之雅志清風披拂奉可爲
廉吏之遺規蓋有開而必先信可大而可久是
用加贈具階官於戲高文典冊可用爲幽窆之
光衮衣繡裳庶以慰生平之志靈其不昧佇我
訓辭

母張氏加贈恭人

制曰三光五岳氣合則人才挺生高山大川神
降而名世間出故賢喆之有作必推本其所生
非獨母儀是亦天道累贈宜人某氏乃具官某

之母禮虔濯概矩叶珩璜曾而好施雅有丈夫
之志食而能教不忘師氏之儀肆育子以多才
乃娠賢之特異高峻著河山之象夾侍殿廷雍
和擬環珮之音敷陳講席惟予愍冊頌彼母師
身貽樞軸之良規洵矣有聞於百世手闢斧堂
之屯域豈獨可置乎萬家茲加贈爲恭人於戲
際五百年之期鍾美同功於惟岳應十六相之
數發祥比跡於高陽

翰林院檢討繆昌期授徵仕郎

勅曰昔我神祖妙選吉士翔集禁林山陵旣

成人物茲茂朕臨朝顧視文石螭陛之間載筆
夾侍者皆先朝宿學舊儒也豐芑之思其曷忍
後具官繆昌期經術淳深風操端直升華祕館
則彊學有聞養贲丘園而蹈道彌固蓋以特立
獨往之士當讒說殄行之時淡然孤貞蛾眉何
憾於謠詠睠言忠愛龍髯想見其攀號指魏闕
以來儀及虞門之再闢道揚末命不及秉賓階
之書劾忠新朝亦曰藉太史之友伊余謀落顧
此周行乃以覃恩授具階於戲以執簡紬書則
取其文直事核以橫經論道則貴乎道德洽聞

為吾異日之獻臣無愧兩朝之舊學思有以稱
尚勉之哉

妻李氏封孺人

勅曰凡我臣工宣力在朝委蛇退食朕靡不省
察其私至於禁近之臣朝夕載筆其閨門相貳
尤人主之所深念也具官某妻某氏動應衡規
言無疵悔饋祀著克羞之禮贈問有解佩之風
秉是壺彝以恭大而慈小恒其貞德能屏貴以
御窮其惟淑人相爾吉士悠然靜好若雅琴之
相和襲彼清寒與冰銜而交映茲特封為孺人

祇服譽命益勉歲時庶幾管彤之高風將與汗青而竝著

父炷贈徵仕郎翰林院檢討

勅曰士終身晦跡隴畝而躬服禮法施於後昆其誠心樸學有久而彌光者焉夫教始於家而禮求諸野是豈特家門之範而已哉繆某乃具官某之父含章可貞介圭不飾少無子弟之過長多長者之言家有嚴君凜然取法於俯梓克念天顯終焉啜泣乎分荆其言行規矩古先有坊而有表其動履措柱末俗不徑而不游秉四

禮以御家馨鼓唯肅躬四教而迪後榎楚有嚴念彼先民嗟虎賁之不作識其遺訓用鴻羽以爲儀是用特贈具階官稽古表宅之風漆書何愧附於一行之傳青史可徵

母夏氏贈孺人

勅曰古之女子言動有文自箴圖之教廢而今德懿行秀於閨門者獨賴子孫之賢以發聞於後國有寵章其亦以佐彤管之不逮與某氏乃具官某之母出於冠族少有令儀事嚴重之尊章辛勤無閒於膏火支零丁之門戶漂搖有甚

於雨風敬則如賓肅逾朝典宜有令子爲我近
臣正色寡言宛爾珩璜之遺教紬書載筆居然
辟呬之良規風範有初光塵未昧茲特贈爲孺
人於戲能勞有繼誠不愧於母師可頌而圖終
有聞於女史

左春坊左贊善兼翰林院簡討繆昌
期授儒林郎

勅曰古有贊善大夫翊贊太子出入動靜苟非
其德義則必陳古以箴焉國家監古設官選擇
名德追懷先正風烈凜然今吾簡用史臣寵以

書命慎重茲選猶前志也具官某學得精華性
成肅括升自祕館蔚有君子之文賁於丘園淡
然堅貞之德回翔久次寘彼周行造士代言良
多裨益擢居門下實在左坊人地深嚴兼侍直
編摩之任器資清篤在商敦周鼎之間乃以覃
恩授具階朕前制不云乎所貴乎史臣者謂其
道德洽聞而文直事核也今史局紛如筆削錯
互爾諳掌故之事而有左董之心所謂陳古以
箴者且以史事爲職志焉朕則顯陟女

妻李氏加贈安人

勅曰朕登進近臣庶幾德選幽貞靜默翔集禁
林有窈窕之風焉然非相貳有人則退食委蛇
誰與媿美召南之詩朕深爲臣子念之具官某
妻封孺人某氏儀度肅雖性資淑茂衣有穿弊
秉共儉以爲師珥無光輝謝華丹而自遠靜好
在御宜彼清寒道誼相規凜於圖史展矣素沙
之德蔚然彤管之風茲加封爲安人服我訓辭
永綏福履

父炷先贈徵仕郎翰林院簡討加贈
儒林郎左春坊左贊善兼翰林院簡

討

勅曰朕慨想先民追懷本俗思得鄉里一行之
士倣古表厥宅里之風今吾近臣粵有先德庸
以愍冊代彼漆書贈具官某乃具官某之父稟
性尊嚴禔躬方大爲孝爲友德行之教有三曰
祭曰喪吉凶之禮唯四蓋昭代諭民之令甲著
在民間而古先範世之格言遺於家塾是以躬
行君子脗合師氏之規家有嚴君不替家人之
則肆而今子爲我儒臣惟其是訓而是行所以
可大而可久是用加贈具階官於戲禮失而求

見獲故國舊君之思可謂至於此極矣謝臯羽之於亡宋也西臺之記冬青之引其人則以甲乙爲目其年則以羊犬爲紀庾辭讒語喑啞相向未有如原吉之發摠指斥一無鯁避者也戊申元日則云月明山怨鶴天暗道橫蛇丙寅築城則云孺子成名狂阮籍伯才無主老陳琳殆狂而比於諄矣或言犁眉公之在元籌慶元佐石林誓死馳驅與原吉無以異佐命之後詩篇寂寥或其志故有抑悒未伸者乎士君子生於夷狄之世食其毛而履其土君臣之義雖國亡

社屋猶不忍廢則其居華夏仕中朝又肯背主賣國以君父爲市儈乎夷齊之不忘殷也原吉之不忘元也其志一也孔子必有取焉彼謂原吉爲元之遺民不當與謝臯羽諸人並列於忠義者其亦闕於春秋之法已矣

跋朱長文琴史

朱長文琴史載董庭蘭事云薛易簡稱庭蘭不事王侯散髮林壑者六十載自古心遠意閑體和撫絃韻聲可以感鬼神天寶中給事中房瑄好古君子也庭蘭聞義而來不遠千里瑄爲給

早以英妙冠於南宮臨軒獨見其縱橫 皇祖
親爲之嘉歎久游詞館爰晉宮僚密侍禁林兼
金馬承華之署休有譽處在珪璋琬琰之閒簡
擢方新體望滋茂乃以覃恩授具階於戲豐水
有芭念詒厥於前王左右奉璋賴攸宜之髦士
惟靜深可以畜德惟博達可以濟時益勉自修
以須不次

妻吳氏仍前封

勅曰詩不云乎有齊季女言大夫之妻能奉祭
祀而尤美其少而能敬也今吾近臣內有相貳

齊敬之風何以異此具官某妻封安人某氏生
於冠族作配君子布衣疏食身謝穠華濯概組
紉行應圖史靜好之音叶而相和白賁之德貞
而不改所謂少而能敬殆無愧焉茲仍封爲安
人余欲陳采蘋之詩被之弦歌以風於閨房必
自爾始

父天瑞先封翰林院修撰儒林郎加
封承德郎右春坊右中允兼翰林院

編修

勅曰人才之生必有原本棧樸杞梓固非一時

之材蓄畚耨亦豈一世之積風流弘長我有
近臣考厥世家著之書命封具官某乃具官某
之父性資恢傑器縕純明獨抱遺經陋訓故蟲
魚之學慨有大志希玉杯繁露之儒藏器不沽
詒於爾子昔在乃考蔚爲名賢射策未對於天
人作令有聞於俎豆而爾躬服箕裘之訓身居
作述之間用啓後賢大光前志詩不云乎無念
爾祖聿修厥德爾子念之矣先河之報或委或
原紹聞衣德是誠在爾是用加封具階官聿求
世德式廣貽謀將三命而益共知百福之未艾

母徐氏仍前封

勅曰凡今公卿大夫至於元士濟濟然抱忠履
信立吾朝皆聖善之教燕翼之方所致也矧吾
侍從曰有母師不大封崇是忘報施封安人某
氏乃具官某之母少躬圖矩具有壺彝經之以
孝慈緯之以恭儉是生賢子早踐禁途簪笏依
然時引外家之故事樞軸宛爾每陳女史之良
規宜服殊恩以章內教茲仍封爲安人於戲文
駟雕軒時游玉堂之上翟第副笄不改素沙之
德傳之禁林稱爲盛事益綏福履副我訓辭

牧齋初學集卷第九十一

牧齋初學集卷第九十二

外制二

都察院左都御史鄒元標授資政大夫

制曰朕聞天下有道則鳳麟畢游其郊而君子在朝則猛鷲咸斂其毒故自古久安長治之世必有老成典刑之人骨鯁著于先朝壽考遺于累世聲色可以不動而朝廷為之日尊敢告路朝誕敷休命具官鄒元標三朝遺直一代名儒當弱冠以登朝已許身而徇國一朝抗疏正君

臣父子之倫九死投荒皆窮理盡性之日賜環
滋久介石不移浮湛掖垣郎署之間身如傳舍
歸休華門環堵之內望若斗山追我初元首先
召用中外爲之相慶父老至于涕流望李邕之
衣冠果有異于當世省唐介于圖像恍或疑其
古人遂以貳卿擢爲執法孤忠一節固以彈肅
雄班正色斂容亦可搢柱國論匪獨僉言之惟
允蓋亦風聲之凜然乃以覃恩授具階錫之誥
命於戲惟此中臺古爲峻秩包拯張昇之于有
宋竝號敢言顧佐黃紱之在本朝咸稱不撓以

臺綱之頽陲兼黨議之喧呶朕欲正是國人爾
尚庶幾前烈顧我舊德豈煩訓辭欽哉

妻吳氏加贈夫人

制曰夫婦之義比之君臣國家不忘者舊之恩
而室家亦有新故之感死生契闊良有同悲用
以廣恩是爲知教具官某妻累贈淑人某氏珩
璜叶則榛栗告虔佐夫子于盛年如旭日之始
旦躬婦順于卒歲恒夙夜以視星邈矣徽華悲
哉淪逝人不如故在昔咸記遺簪之悲而義或
勝恩朋友乃輟宿草之哭雖永逝之傷已往而

偕老之託如新茲加贈爲夫人尚其淑靈服此
休命

繼妻江氏加贈夫人

制曰忠義之臣蒙危難以殉國賢明之配茹艱
貞以殉夫苦節以相成而令名以相報此鬼神
之所佑相也而國家安得遺之具官某繼妻累
贈淑人某氏歸于令人備著婦德當抗章嚴譴
之日有間關從戍之行哀矣流人邈焉鬼國六
年瘴癘初何意于生還廿載浮湛乃纏悲于死
別吁其逝矣命之不猶臣猶有賜環則復之期

而婦終無翟茀以朝之日覩此恩波之浩蕩悼
彼下泉追惟放逐之顛危有如噩夢茲加贈爲
夫人於戲夫子旣保全晚節而爾亦獲享有令
名風霜凜然何異偕老于白首管彤不朽故知
無憾于黃壚不徒著貞順之名可以爲節義之
勸

繼妻高氏加封夫人

制曰人臣挺然孤忠白首一節蓋必有賢明之
助焉老而彌堅者士節也少而能敬者女德也
修女德以佐士節誰其尸之有齊季女斯所以

爲有家之美乎具官某繼妻累封淑人高氏識
明鏡鑑訓習依阿却丹華而不御龜勉盛年躬
澹泊以相成保全晚節衡門泌水甘偕隱以終
身宿火寒燈恍友賓之相對庶幾松栢之性說
而相成是以姜桂之風老而逾烈惟爾令德媿
我老成旋觀退食之委蛇彌見在御之靜好茲
加封爲夫人永綏福履服我訓辭尚繼采蘋之
詩以昭管彤之烈

祖璇先贈通議大夫刑部右侍郎加
贈資政大夫都察院左都御史

制曰節義之臣國之元氣國家之培植固必本
之累朝而家庭之養成蓋亦貽之百歲朕睠懷
豐芑追念箕裘眷我蓋臣聿求祖德累贈具官
某乃具官某之祖父德無考類言成文章慷慨
有丈夫之風孝謹修長者之行仁心爲質昆蟲
亦荷其生全至德感通虎豹咸屏其搏噬親朋
待以舉火閭里薰而成風蔚矣詔謀施于孫子
孤忠一節大奮世德之光樸學素心不改先民
之質尚識遺風之自可無邁種之嘉是用贈具
階官於戲雄班峻秩進專席于在朝袞衣繡裳

退有事于家廟其將朕命詔于有神爾祖爾思
可以觀德時乃休哉

祖母歐陽氏加贈夫人

制曰宋制不云乎古之賢母稱于天下能教其
子此爲歐陽修之母言之也今吾錫命蓋臣及
其祖妣于稽其家世所謂以能教稱者至于今
未艾豈可誣哉累贈淑人歐陽氏乃具官某之
祖母祖風綿邈女範肅離事夫子則敬如賓友
治寢門則肅如朝典至其詔厥孫謀辟呬相詔
能使節義道德之士出于襁褓頭角之中豈亦

歐陽氏之遺教猶有存者與肆我追命正名小
君傳之典冊于宋制亦有光焉不獨一家之盛
事而已

父濟先贈通議大夫刑部右侍郎加
贈資政大夫都察院左都御史

制曰賢才之生必有原本國有協氣必鬱蒸爲
禎祥家有善人終濬發爲賢哲天之所助非人
所爲余有寵章用昭誘勸累贈具官某乃具官
某之父王介不琢金扣有聲百行渾圓洵慥慥
之君子六德純備蓋藹藹之吉人正喪祭之禮

于一家是亦爲政施任恤之恩于三黨惟恐人
知嘉我蓋臣率繇遺訓守其樸學曰惟孝而惟
忠推此仁心誠不踐而不履用保世而滋大洵
積善之有餘是用贈具階官於戲祀于瞽宗鄉
先生之可祭于社詔以追命卿大夫之有位于
朝展如來止而來游庶幾有觀而有感

母羅氏加贈夫人

制曰蓋臣必移孝以爲忠賢母必教忠以爲孝
道一而已蓋百世以爲師天之所爲殆十年而
必復累贈淑人某氏乃具官某之母家惟舊德

範爲女師禋躬一本于頌圖教子無逾于忠孝
六年瘡癘初無憾于辭親數載丘園遂決計于
偕隱在昔范氏之母徒慨想于齊名若彼介山
之封猶感嘆于言祿惟爾母子之際藹有道德
之風教誠炳然徽華已往風停樹靜空悲一命
于下泉創鉅痛仍長感孤生于萬里迨乎三朝
懋遺之日乃霈九京追命之恩蔚矣生榮而死
哀誠哉是母而是子茲加贈爲夫人於戲雕軒
有煒不以易管彤之名愍罔追崇終能昭節義
之報旋觀瀧岡之表何慙騶國之稱

巡撫天津備兵海防贊理征東兼理糧餉都察院右僉都御史李邦華授中憲大夫

制曰朕鎮撫疆圉規圖遼海控三方而建節鉞地利惟均當一面而制咽喉天津尤要克厭疆場之難有安社稷之臣佇爾膚公聽余休命具官李邦華謀猷膚敏器縉純明早以循良擢居臺諫正繩糾駁柱國論于紛呶持斧巡行肅官嘗之類阨遭逢鈞黨淹抑家居志九折以不回才百鍊而愈老惟茲重遣實允師言當干戈填

塞之時單車就道受方隅倥傯之寄夙夜視師推心束伍行陳之間比于家人父子置身島嶼風濤之內有如舟子長年凡其草昧以經營靡不拮据而荼捋節鎮伊始勞勩有聞乃以覃恩授具階於戲天津上應天文拱垣墻爲內屏下臨溟渤控碣石爲外藩遠扼渝水鯨鯢之區近通直沽芻粟之路以要害莫強之地付緩急有用之才能釋朕東顧之憂斯爲我北門之管嗣有崇叙須爾告成欽哉

妻周氏加封恭人

制曰人臣僇力疆場豈暇顧其室家而婦人治業寢門恒有資于軍旅肆我節鎮粵有勞臣相助有人朕所深念具官某妻封孺人某氏德成柔順禮含文嘉勤旨蓄以相夫宦成不替服布荆而屏貴偕隱彌堅居然女士之規雅有丈夫之槩今爾夫既分勞節鉞而爾益黽勉機絲鈴索蕭然尚想向屏之託織薄作苦猶餘辟績之風茲加封爲恭人益勉閭內之勞用佐師中之錫

父廷諫原任南京刑部浙江清吏司

署郎中事主事封中憲大夫巡撫天津備兵海防贊理征東兼理糧餉都察院右僉都御史

制曰人才之生多本家世蓄畬堂構自古記之若乃家庭之間節目礪砢名行茂著志義蔚然則豐芑之遺休而式穀之盛事也朕深嘆焉原任具官某乃具官某之父孝友天性仁厚少成衾影無慚教人必本于律已脂膏不潤服官無異于食貧白首爲郎皆隨牒以平進青氊舊物終解組以言歸蓋爾子既有抗節之名而爾遂

惟鈞黨之禍丹鉛一室有父子之自爲相知風雨中宵笑譖人之亦已太甚流言已息蹈道彌高移孝教忠誥誠昭回于節鉞東修勵節風猷炳著于箕裘惟此象賢用嘉燕翼是用封具階官於戲建牙設旒爾方屬目于壯猷安車蒲輪余尚興懷于耆舊尚其彊飯遲我乞言蔚矣令名著于策命

母周氏贈恭人

制曰書不云乎若生子罔不在厥初生蓋胎教若有使然而娠賢本之天性古之母師所以善

成其子豈獨以辟呬提誨爲能事與贈孺人某氏乃具官某之母德比瓊璜訓閑圖史嬪繇華胄奉井臼以如飴事彼嚴姑凜清溫而式度寢門寂若笑言不聞于鄰環珮穆然愠怒不形于色是生賢子似其母儀藹然麟趾之風本其仁厚肅矣羔羊之節似彼安貞宜其沒身体有華問茲加贈爲恭人抱文駟雕軒之感極彼窮塵慰白華朱萼之思服茲寵命

繼母萬氏加封恭人

制曰朕逖觀漢事至翟母之育方進而知禮之

所謂繼母如母也矧相夫勗子竝有令名女士之徽慈可無褒與封孺人某氏乃具官某之繼母敬德不愆令儀有淑維筐及管恪修蘋藻之誠曳縞與綦力贊素絲之德至于辛勤而鬻子蓋尤篤摯于所生視無閒于一心祝有同于類我深慈茂著儀範滋章茲加封爲恭人尚齊織履之名終迓雕軒之福

巡撫保定等府提督紫荆等關兼理海防軍務都察院右僉都御史張鳳翔授中憲大夫

制曰乃者狡夷稽誅郊關多壘朕旣聞鼓鼙而思將帥士爭釋禮樂而稱干戈睠維畿甸之間兼控邊關之重烽火易達鎖鑰須人我有賢臣受茲重寄具官某器資拔傑風力肅明筮仕理官晉登選部措柱流俗如止水之不波澄汰官邪若操刀而能割蔚有體望著于清卿出撫近畿屹爲重鎮內連三輔據河朔爲北門外控三關捍燕趙之右臂以邊腹交并之地付緩急有用之材仗鉞受脰副此臨軒之特遣建旗設旄分吾戎閫之深憂旋觀節鎮之勳敢後便蕃之

錫乃以覃恩授具階於戲扼吭拊背無徒問故
事于前朝倒馬飛狐尤當警胡塵于近代相視
衿要繕西關以轄東隅警服民夷壯近畿而威
遠徼尚有資于撻伐豈無係于安危勉思令猷
荅此休命

父道情先贈中憲大夫太常寺卿加

贈巡撫保定等府提督紫荆等關兼

理海防軍務都察院右僉都御史階

仍前

制曰先王崇獎孝義表厥宅里迄于後世猶有

崇臺綽楔之褒今吾蓋臣追命先世潛德弗耀
而卒以發聞亦以佐吾宗獎之未逮也贈具官
某乃具官某之父禮充物簡言炳身文孝弟力
田躬親德行之教敬敏任恤家傳保受之風建
塾以合鄉之子弟本六俗之聯師儒捐租以救
歲之凶裁繇五家而及閭族是生令子教以義
方羽可用以爲儀光自遠而有耀是用贈具階
官於戲誠心質行生而爲德于鄉揭德振華歿
而可祭于社是可徵惇史壹行之傳不獨膺治
朝三命之榮

母馮氏仍前贈

制曰今吾臣子推恩必始于前母蓋澤必流于
自葉而祭必重于先河禮有本而典有彝亦所
以著教也累贈恭人某氏乃具官某之嫡母贊
虔棗栗儀茂蕙蘭濯漑概齋盛克盡女官之教毫
羹滫瀡無忘內則之勤胡不永年克昌厥後無
子而有子邈矣梧捲手澤之思因親以及親依
然奩粉口脂之慕茲仍贈爲恭人於戲德無不
報教必有初閔予長樂之思及爾漏泉之澤

繼母吳氏仍前贈

制曰序稱公子仁厚之德必本后妃逮下之賢
本立而後道生自家可以刑國肆余愍用視彼
漆書累贈恭人某氏乃具官某之繼嫡母婉婉
宜家順柔媿德代姑減筭純孝質於神明助施
傾囊爲德徧於里黨恩勤鬻子愛有逾於所生
辟呶爲師食不替於能教順能逮下和以致祥
惟此織屨之深慈增華於圖史益知鼓琴之靜
好叶德於閨房宜有令人鍾其餘慶茲仍贈爲
恭人於戲美哉蓼蕭之什取其攸同展矣樛木
之詩可爲風始

生母趙氏仍前贈

制曰天有法象恒垂須女之占易于妹歸尤著其娣之吉故家茂娠賢之德則國崇追命之文雖出曠儀亦應彝典累贈恭人某氏乃具官某之生母蘭儀式備蕙問下身謝丹華協素風于闐闐動循環珮應和氣于房幃肆徵大國之詳允叶小星之德載霑寵命用卹恩私追長樂之鼓鐘愴矣纏悲于下地攷孝慈之典用殷然動念于終天歿者有知存者不匱茲仍贈爲恭人於戲母以子貴已徵禮經之文無忝所生尚

念詩人之義

巡撫廣西等處地方軍務都察院右僉都御史何士晉授通議大夫

制曰朕臨遣節鉞錯置方隅蓋將極選一時之材用以張皇九牧之寄矧粵西一道僻在西南鎮撫之艱得人惟允具官某性資拔傑風力肅明擢在瑣闥綽有休譽當先帝之在潛邸值春宮之有震驚發憤扣關奮讜言以奠安儲位孤忠去國在外藩而雅意本朝迨我初元召居卿寺以風猷之茂著遂節鎮于遐方蓋爾旣宏

才而粵又舊治吏民服習撫烏蠻黃洞以長子
孫地利熟諳列三江八寨而爲門屏矧中朝授
鉞之始正鬼方告急之時觀其慷慨以治行知
能譚笑而戡亂乃以覃恩授具階於戲往代邕
管之跡具在荒陬先臣藤峽之勛紀于國史至
乃勦苗之近事多從西粵以會師竭爾忠誠著
爲方略佇彼禡牙之日紆余拊髀之憂爾往欽
哉無荒朕命

妻吳氏加封淑人

制曰爲吾才節之臣必有賢明之配勤勞旣著

榮爵惟均國有常經亦以示教也具官某妻累
封恭人某氏出自甲族歸于名儒門戶伶仃則
茹荼偕苦服官黽勉而麤糲戒廉迨夕垣抗疏
之時正闔門惶恐之日一朝放逐念門屏之蕭
然數載栖遲喜室家之宛爾幸哉牽復及此寵
光以我御窮永言肯畜于家食與子偕隱豈知
翟茀以來朝國旣昭從爵之榮天亦厚勞人之
報茲加封爲淑人予之石窳蓋有待焉昭于管
彤斯亦可矣

父其孝先贈中憲大夫太僕寺少卿

加贈通議大夫巡撫廣西等處地方
軍務都察院右僉都御史

制曰人之有福祉如有基而厚墉也基既浚矣
墉亦如之故士有文明柔順蒙難于身而發聞
于後者天道雖遠固可以量測也累贈具官某
乃具官某之父寬然長者溫溫恭人孝友性純
若珪璋之渾合中和氣備類桃李之不言遘閔
孔多遭家不造事久而論始定身沒而志乃伸
天不吾欺白日責臨于幽室人誰無死丹書昭
雪于下泉矧茲牙燾之煒煌兼以絲綸之重疊

種冥冥之德終能獲報於人間視夢夢之天誠
亦何憾於造物蓋十年而必復信百世其可知
是用贈具階官於戲惟我有臣惟爾有子求忠
於孝蔚然青史之光資父事君邈矣先河之澤
爾靈不昧尚服享之

前母黃氏加贈淑人

制曰士以拮据起家爲能婦以黽勉相夫爲德
其或年德不配勞勩有聞不羸其躬以昌其後
朕尤盡焉傷之累贈恭人某氏乃具官某之前
母秉是壺彝作其內治度身量腹躬操作以窮

年宿火篝燈與壘鹽而并日命之不淑惜矣無
年用啓右爾後人遂發聞於再世自古開國承
家之事惟草昧爲艱難而先王先河後海之文
在典祀爲殷重惟予愍罔念彼勞人茲加贈爲
淑人匪徒爲泉壤之光亦以著閨門之勸

母錢氏加贈淑人

制曰古稱母師必云胎教非獨辟呬之相詔抑
亦風氣之有傳爲我娠賢可無揚美累贈恭人
某氏乃具官某之母生柔而笄禮下肅而上慈
當家門不造之時正相助惟艱之日漂搖風雨

進雞鳴如晦之箴黽勉晨昏爲卵翼自全之計
高朗有丈夫之德嚴恪修女士之儀惟爾藐孤
率繇慈訓夕垣奮筆緬然畫荻之遺規辰告宣
猷宛爾機絲之餘教雖風徽已沫於當日而儀
法具存於後賢茲加贈爲淑人有命在天旋觀
瀧岡之表其則不遠永爲彤史之光

繼母吳氏加贈淑人

制曰烈婦之於家也忠臣之於國也皆奮不顧
身以信其耿介者於方寸而已然而母著苦節
子抱孤忠一室用以相成而千秋萃爲盛事余

有典冊宜亟著之累贈恭人某氏乃具官某之
繼母仔肩壺彝式是嬪則誓白骨於泉壤不負
所天撫黃口之孤童逾於已出付餘年於血淚
之內九死而一生出遺孤於刀俎之中再世而
一息迨子既奮身於上第而爾遂畢命於下泉
倘逝者之有知信下報而不愧於戲覽孤生伏
闕之疏鬼神涕洟迨夕郎扣闥之章天日震動
忘身殉國固知其志義之激昂移孝作忠亦本
於賢明之風勵茲加贈爲淑人於戲勸懲存乎
百世忠節聚於一門褒敘死生厥有徵於故府

區明風烈庸有裨於王章

大理寺添註右少卿洪文衡授中憲
大夫

制曰朕惟今日振鷺充廷皆皇祖之所以詒
朕也然而人才實難摧剝滋久起於梓漆之舊
屹爲榱棟之材誰其尸之我有人矣具官洪文
衡學有淵源行無考類踐更郎署閱歷清華每
懷憂國之心屢發矯時之論蓋嘗首陳國本之
裒杞不以主怒爲嫌疑力折黨人之披猖不以
宦成而消阻後先流落抗論不衰取次登庸蹈

道彌固越予嗣服佇爾起家睠黃髮於三朝衣冠惟舊瞻白首之一節志氣聿新豈惟爲廷尉之平抑且司邦家之直永言宿德霈此明綸乃以覃恩授具階於戲惟祖宗豐芑之遺實東南竹箭之美以風簡著龜一世以霜稜枝柱本朝廷有奸回人爭避神羊於李絳政多闕遺朕將取人鏡於魏徵爾其念哉無荒朕命

妻程氏加贈恭人

制曰士君子風義篤厚其於室家黽勉死生契闊之故未嘗不愀然也人主其有以卹之具官某妻累贈宜人某氏出自冠族歸於令人膏火清宵悵矣內言之猶在機絲永夜惜哉中道之已捐惟君子之簪履不遺故國家之絲綸有耀茲加贈爲恭人用以昭管蒯之義不徒爲宿草之光

繼妻汪氏贈恭人

制曰爲吾砥節奉公之臣其於高華膺厚之思亦已薄矣故必有賢明之配攻苦而食淡者以欣助之具官某妻累封宜人某氏名家作配季女有齊以淑慎物其身省同惟月以勤勞佐其

耦傲逾視星至於淪落之有年期於沒齒而無憾賜環如舊舉案已非茲加贈為恭人尚永貴於泉臺以區明其風節

父蒙先贈奉政大夫南京工部屯田

清吏司郎中加贈中憲大夫大理寺

添註右少卿

制曰士有內行淳備不階咫尺之權勢而鄉里誦義無窮者斯其人已足述矣矧其後人用能衣被厥德以昌明於世累贈具官某乃具官某之父飭躬厲行陳義本仁事嚴父以承顏偃俚

有同乎俯梓養慈庭而竭力夢思無間於背護薰其德而善良幾千人矣意其賢而尸祝以歲計之里社就以質成無煩馨鼓終訟于焉屏息視彼丹書宜爾後賢載其遺德咸曰箕裘之滋大惟其播穫之有聞是用贈具階官於乎高廷尉之門人誰不勸贈比干之策天其有知

母程氏加贈恭人

制曰古之賢母所以稱為母師者以其磨切道義勗其子以古人之能事而不以熏灼動其心也累封太宜人某氏乃具官某之母相夫以淑

慎爲儀育子以愛勞爲訓辛勤三世終身謝彼
丹華黽勉一生爲婦逾於白首內美純備修能
有聞至其教子以事君不惜違時而淹久浮湛
家食期偕隱以長終騰蹕興朝惟備官之是戒
以爾子體望滋茂知母氏徽範不忘茲加贈爲
恭人是可繼介山之封行且觀瀧岡之表

大理寺右少卿曹于汴授中憲大夫
制曰朕睠懷弘濟思見老成如重器之有河圖
以昭法象如佩物之有觴珌以解嫌疑苟得其
人有益於國我有好爵申以訓辭具官曹于汴

明允篤誠正直忠厚早以民譽登於諫垣矩行
禮容庶幾還風俗之厚正繩直筆有以知朝廷
之尊屬國論之喧呶能危身而措柱道無可枉
歸不待年卒歲優游惟有讀書而譚道輟耕歎
息或以畏天而悲人茲予旁求爲朕強起旣見
君子爰復綴於清班尚有典刑將每詢於黃髮
乃以覃恩授具階於戲若古有訓無競惟人挺
然孤忠人誰完節於白首蔚然難老天其愁遺
於本朝尚鑒余求助之心庶不負平生之學

妻侯氏加贈恭人

制曰詩不云乎刑於寡妻有道之士束修砥節
家人婦子之間有素風焉具官某妻封孺人某
氏備有壺則克配君子事上則榛栗告虔相夫
則壘鹽不厭少而御窮長而屏貴環佩穆然閨
門化之徽華雖往儀範滋著茲加贈為恭人自
家刑國庶有觀感不獨慰其死生而已

父希堯先贈徵仕郎刑科右給事中
加贈中憲大夫大理寺右少卿

制曰人才之生國之元氣天降時雨則山川效
其能國產賢人則家庭韞其美明德之世有開

必先自古記之子何疑者累贈具官某乃具官
某之父修長者之行爲君子之儒言有物而行
有恒入則孝而出則弟強學忠信士類望焉表
儀中和祇庸閭里薰而顧化肆而有子爲我賢
臣風教一稟於先民節義大光於天下如雲於
嶽旋觀膚寸之興如水於河尚識濫觴之自是
用贈具階官於戲祀以仁者之粟爾其顧歆祭
於瞽宗之間人咸覲止終有聞於永世夫何愧
於冊書

前母喬氏加贈恭人

制曰或委或原著於禮典報本反始誰昔而然
今吾臣工追思前母漏澤泉壤朕何忍忘贈孺
人某氏乃具官某之前母德稟柔明性惇淑茂
嬪於令族綽有懿風享命不延發祥有自毛裏
雖隔孝思永存茲加贈爲恭人淑靈有知尚克
享此

母張氏贈恭人

制曰古之母師粵惟孟氏能教其子蔚爲儒宗
吾有賢臣率繇慈訓是母是子趾美頌圖肆余
寵嘉之累封太孺人某氏乃具官某之母婦道
可宗母儀茂著起家仁厚是生麟趾之賢教子
義方不替羔羊之訓樞軸之範逮我名卿珩璜
之風本諸賢母茲加贈爲恭人於戲爾子名德
滋顯饋享用加昭於彤管追配騶國朕之策命
亦有耿光哉

太常寺少卿鄭三俊授中憲大夫

制曰太嘗卿貳位任特隆歷代迄今謂之清選
朕旁求俊乂克典神天蓋將妙簡禮樂之司所
以增重廟廊之寄中我茲選莫非正人肆有覃
恩可無書命具官鄭三俊性資恢傑風操端莊

初以循良進於留署回翔守郡敷歷憲司不競
不絀惟隨牒以平進所居所去皆有跡之可書
闕闕既深體望滋茂爰躋卿寺留貳秩宗奉珪
與璋展矣禮容聲樂之器匪朝伊夕肅然寅清
絜白之心考資望以孰先在廟朝而惟允乃以
覃恩授具階於戲礫若多節表廣廈之棟梁居
然雅音中清廟之琴瑟惟不器斯所以爲君子
惟大受斯不可以小知爾尚欽哉服乃休命

繼妻呂氏加贈恭人

制曰詩云有齊季女爲說者以謂美其少而能

敬也而周南之化在焉今吾名卿身居禮樂之
地而家有齊敬之德采蘋之云豈不信哉具官
某繼妻某氏出自德門教成師氏珩璜琚瑀具
有禮容酒食祭賓動協內則相在公於夙夜觀
退食之委蛇居然惟筐及筥之規蓋亦在廟在
朝之助茲加封爲恭人無忘蘋藻之風益茂管
彤之德

父國光先贈中憲大夫河南歸德府
知府加贈太嘗少卿仍前階

制曰國有百世之計莫先於樹人而家有百年

之貽咸本於種德樹人之源流遠其發祥恒始於家而種德之善慶長其元氣必鍾於國我有卿士蔚爲寶臣溯其家風厥有原本累封具官某乃具官某之父天性真淳躬修悃悞本六俗之聯兄弟欣彼昏喪自五家以逮間聯賙其艱阨仁風扇物桃李之下不言至德感人桴鼓之應如響風規已遠名德滋章皎皎白駒世咸慕逸民於空谷皤皤黃髮天不遺壽耇於清朝旋觀燕翼之貽彌想鴻漸之羽是用贈具階官於戲沒而可祭於社斯其人與生而未竟其施宜

有子矣

母柯氏仍前贈

制曰小雅之不作而白華之詩廢也朕深念之今吾有南陔潔白之臣而家有夔我違背之感推恩之典豈可後哉爾累封恭人某氏乃具官某之母事夫資敬訓子移忠宿肉異糗洗腆克供于兩世恭大慈小恩勤逮及于一家惟此令妻兼爲壽母迨爾子旣升華清選而爾遂弃養高堂麤糲自將尚念菽魚之祭夙夜黽勉長懷機杼之規生已播其徽華沒益徵其儀範茲加

贈爲恭人於戲再命之恩已便蕃矣三釜之歎
有窮已乎

牧齋初學集卷第九十二

牧齋初學集卷第九十三

外制三

太僕寺卿吳默授大中大夫

制曰在昔久安長治之世必有骨鯁彊直之臣
如鴈玦之解嫌疑若猛鷲之衛藜藿名在海內
望及累朝朕用慨然想見其盛具官吳默嶷然
山立湛然淵停以高文冠冕南宮以素節回翔
郎署議易名于典禮則出入陽秋著雅望于璽
丞則愷勤夙夜迨納言封駁之日正衆議誼歟
之時職思其居侃然以喉舌爲任義形于色再

三上駁正之章將朕師之不驚庶國論于有底
比游登乎卿寺猶養賁于丘園羽儀滋章蹈道
彌固乃以覃恩授具階於戲繼序伊始多難未
堪人皆競進于本朝余方求助于在廟如聞風
烈尚有典刑母壹意于卷懷其勉思夫正國欽
哉

妻龐氏加贈淑人

制曰夫婦之義備于風人雞鳴有交儆之勤琴
瑟有偕老之嘆百爾君子閔焉傷之具官某妻
贈宜人某氏少以女士不勤姆師克有令儀作

配君子命之不淑溘矣長終翟茀以朝何以慰
縞衣之歎蘋蘩可薦依然與宿草之悲茲加贈
爲淑人賁此愍綸詔于幽窆鬼兮不昧尚克享
之

繼妻殷氏加贈淑人

制曰朕聞嚶鳴之好莫如友生簪履之求不遺
故舊夫婦之際二者兼之死生契闊尤足悲也
具官某繼妻贈宜人某氏有齊季女來嬪德人
修織衽而有儀操井臼而唯謹迨于撫仕已絕
哭于陳根以我御窮尚興思于旨畜式覩新恩

于象服永言舊事于牛衣茲加贈爲淑人庶幾
百年之遺思不與長夜而共盡

祖奎贈大中大夫太僕寺卿

制曰朕休承丕緒盼布湛恩凡我臣僚均茲介
福今吾九列之臣里居休沐乃獨請堅辭蔭叙
追恩祖妣用以錫孝思于無窮風廉恥于有位
余嘉乃志著之訓辭吳某乃具官某之祖父慷
慨慕義倜儻多奇以任俠而長貧雖屢躓而不
悔慨有大志詒于乃孫今爾孫志節巋然覃恩
之典猶能楛柱末俗非爾之遺風也與是用贈

具階官於戲率祖以霈恩辭榮以教讓傳之彝
典著爲美譚豈不休哉

祖母孫氏贈淑人

制曰詩不云乎孝子不匱求錫爾類夫臣之孝
移于君也婦之孝移于夫也孝之爲德錫類自
天雖在沒世必有譽聞某氏乃具官某之祖母
克謹內行動應閨彝移孝敬于夫家事尊章于
篤老宗族稱孝閨門化之施于孫子資以作忠
令德藹然再世滋大茲特贈爲淑人我有訓辭
表于幽宅崇臺綽楫何以加諸

父鵬先贈奉直大夫禮部祠祭清吏司員外郎加贈大中大夫太僕寺卿制曰人才之生原本有自凡志節之茂著必風氣之先開如燧于火如鑒于水默喻爲壺非有使然贈具官某乃具官某之父倜儻負奇修潔自好孝友急難茹荼蓼而彌甘孤特寡援老蓬蒿而不悔抱遺經而教子引古人以爲師命筆丹鉛博喻出蟲魚之外矢心白首風期在牖戶之間爲我蓋臣率由茲訓悵話言之已遠儼微範之猶存是用贈具階官非獨示教忠之規用以爲壹行之表

前母施氏加贈淑人

制曰今吾臣子推恩必及前母揆之典禮無可考見而先河之祭自葉之恩有攸寄焉凡以教民厚也贈宜人某氏乃具官某之前母仔肩壺彝率由圖史拮据荆布閔不逮于春華黽勉歲時溘已先于朝露幸矣其追恩之子乃在所不知之人蓋簪履之棄捐猶不能遺忘于舊故而楛棬之戀慕安得有限隔于裏毛茲加贈爲淑人用以使觀感之人衆著于水木之義

母陳氏加贈淑人

制曰名材之生必依喬嶂簡珠之蘊不在濼流
旋觀哲人之興必本娠賢之德休有華問在其
沒身贈宜人某氏乃具官某之母稟德靜專結
心貞淑少勤濯撫謹婦式于蠶桑長服并春操
家門而荼苦辛勤十指每中夜而篝燈顛顛一
身恒計日而并食嗟相夫之多閔乃教子而有
聞藹然麟趾之風本共仁厚肅矣羔羊之節似
彼安貞我有寵章遡其聖善茲加贈爲淑人惟
此彤管之美傳之無窮庶幾白華之悲釋于有

求

太僕寺添註卿管京營少卿事畢自
嚴授大中大夫

制曰朕嗣守丕構睠顧封疆每思折衝之臣稱
吾臨遣之寄其有文武大略久著行閒邊塞威
名暫居卿寺者朕之錫命豈有愛焉具官某質
性廉直姿材敏明自理官而陟水曹載膺民譽
歷臬藩而推卓異三奉璽書逮入西陲益騰宿
望山川諳習撫長城湟隴於聚米之餘種落畏
懷臥羌羊胡馬於儲胥之內圖像競傳于板屋

萬帳知名軍容留鎮于竝邊諸戎嚙指乃登九
列作我僕臣秉心塞淵允叶元年之頌錫馬蕃
庶正當晝日之時式伸眷倚之懷聿有便蕃之
命乃以覃恩授具階於戲王師在野賊壘未平
當爾釋干戈叅廊廟之際是吾聞鼓鼙思將帥
之秋我馬斯臧既有聞于卿月在師中吉且上
應乎將星爾往欽哉朕有後命

妻胡氏仍前封

制曰人臣之任闡外也猶女子之任闡內也古
之卽戎者曰內政無出外政無入則寢門之業

豈不亦有助于疆場乎具官某妻累封淑人某
氏溫恭叶德雖肅爲儀佐誦讀于寒窻相高寒
于臚仕爾夫子馳驅秦晉敷歷邊陲而爾能寄
軍令于向屏風清鈴索親女工于織薄氣震鼓
桴曰惟女能相在爾室茲仍封爲淑人爾夫子
有師中之寄爾之伙助于闡內者將與膚公俱
奏可不懋哉

祖忠臣先贈中大夫陝西布政使司
右叅政加贈大中大夫太僕寺添註
卿管京營事少卿

制曰古之有鼎銘也以稱揚其先祖之美而著
之後世則夫子孫之有勳德而追美其先自義
率祖亦禮之經也贈具官某乃具官某之祖父
精金未鎔良玉不琢馴行孝謹家傳澣滌之風
根本農桑手創詩書之業睠予卿士惟爾聞孫
于公之門已高歸然綽楔畢萬之後必大蔚矣
雲仍是用加贈具階官酬而勛後之勞示我流
光之報

祖母王氏仍前贈

制曰詩不云乎烝畀祖妣以洽百禮王者所以
事其先也今吾大寮亦得用此推恩之典所謂
自上而下者與贈淑人某氏具官某之祖母頌
圖叶德賓祭飭躬風雨饁耕具有家人之禮法
農桑創業用培絃誦之本源偕老難見于百年
餘慶有光于奕世茲仍贈爲淑人尚思介福于
王母無忘僇力于冲人

父木先贈陝西布政使司右叅政加
贈大中大夫太僕寺添註卿管京營
事少卿

制曰士抱遺經于一室讀出車撻伐經營告成

之詩豈不願于身親見之乎已不得而得之其
子有志之士爲之默舉焉累贈具官某乃具官
某之父學窺墳典行應範模飲水盡歡孺慕有
聞于白首舉火市義好施不問乎黃金肆有後
人繼其大志虎鈴祕卷發揮篋笥之書龍塞宣
猷茂著揣摩之略是用加贈具階官節鎮方新
于臨遣威靈默贊其折衝

母劉氏仍前贈

制曰古之賢母望倚門而辭伏劔者無不教其
子以作忠也爲吾首公之臣弘濟時艱所以慰

其心十安冥者豈有窮哉累贈淑人某氏乃具
官某之母玗璜載德蘋藻揚芬昭婦道于組紉
著母勤于辟績服官滋久告誡彌新絕塞馳驅
已斷許身之志憂時忼慨常懷恤緯之忠睠我
寶臣率茲慈訓茲仍贈爲淑人慰爾梧捲之慕
釋吾輦鼓之思

管理直隸天津至山海關等處屯田
安插遼民事務太僕寺卿兼河南道
監察御史董應舉授中大夫

制曰爲國以得人爲急人臣以憂國爲先今吾

睠顧多艱緬懷共濟而國有臨事之使之慮人無急病讓夷之思朕是用聽鼓鼙而咨嗟在朝廟而嘆息肆我卿士猶有人焉具官董應舉既直且溫亦彊而義以通達世務爲學以奉公體國爲心自擢銓曹以歷卿寺回翔滋久風操愈修乃者狡夷不廷東隅失守追惟桑土綢繆之策可謂蚤見而先憂屬當烽火震驚之時遂能奮身而抗議朕不忘收復乃眷忠勤欲試其折衝之能先付以屯牧之寄爾受命往矣乃以覃恩授具階於戲撫生齒而念版章遼人固吾人也因屯種而寓軍令遼人卽吾兵也在爾之畫地按圖已非一日因用以生聚教訓何待十年尚其策將帥之勳豈徒課農田之績嗣有崇叙須爾告成欽哉

妻陳氏加封淑人

制曰爲吾志義之臣攻苦食淡勞其身以徇國必有賢配艱難懃瘁以相成也朕深念之具官某妻累封恭人某氏生于德門得配君子布素之風被于閨門齏鹽之操凜于白首爾夫子爲清郎爲清卿其得以壹意東修無交謫之慮也

爾則成之茲加封爲淑人闕狄游加素沙如故
永綏福履肆余寵嘉之

祖父公義贈中大夫太僕寺卿

制曰古之君子論譔其先祖之有德善功烈而
銘之祭器其欲稱揚其先祖也可謂至矣今吾
臣工追恩及祖必有書命視諸其子孫之自名
也不滋重乎董某乃具官某之祖父天性篤誠
內行淳備規言矩步則子弟從之敬敏任恤則
鄉里化之畜其善慶以壽後昆厥有聞孫爲我
卿士是用贈具階官於戲惟乃孫祗懋厥績紀
于太常德善功烈皆本厥祖朕之書命尚有耿
光哉

祖母王氏贈淑人

制曰善無不報天不吾欺以鄉里婦孺家人瓌
屑之行而天道罔不監觀焉用以發聞于孫子
吾有寵章亦以著教也王氏乃具官某之祖母
含德在躬壺儀攸備親并曰以相夫飽糠覈而
沒齒辛勤弗懈善慶有遺施及孝孫陟于高位
茲特贈爲淑人烝畀斯及饋享用加謂天蓋高
尚克監止

父克濟先贈中憲大夫太常寺少卿
加贈中大夫太僕寺卿

制曰賢才之生譬之巨木礫若多節斯爲大廈
之資傑然羣材夫豈拱把之積我有卿士蔚爲
棟梁迺其家風厥有原本贈具官某乃具官某
之父馴行孝謹厲節激昂雖在布衣慨有大志
捐貲讓產視財賄如毫毛排難解紛以然諾爲
生死至于版築以禦寇平糴以賑貧高岸崇墉
建于指掌滯穗閒粟化爲社倉蓋誠奇偉倜儻
之人豈曰匹夫咫尺之行宜有賢子以大而家

繼志事以大光洵風骨之不朽是用贈具階官
於戲惟爾有子惟我有臣移孝作忠斯肯堂而
肯構允文允武曰民功而國功尚其冥靈佇此
休顯

母馬氏加贈淑人

制曰古之賢哲必有母師蓋圖頌之風珩璜之
訓母儀克舉臣道具焉累贈恭人某氏乃具官
某之母無非無儀共大慈小備嘗辛若盡家人
之道責備行誼有丈夫之風惟我賢臣率繇慈
訓貞白端莊儼華丹之弗御共儉純壹祭魚菽

而不慙光塵未昧儀範有傳茲加贈爲淑人爾
爲賢母子爲寶臣豈惟先昭彤管亦可以具訓
于蒙士矣

太僕寺少卿陳大綬授中憲大夫

制曰閒者官常剗敝習俗競流思得秉正守義
之人以幾疏穢鎮浮之效士多容悅此風寂寥
誰其似之我有邦彥具官陳大綬器資肅括德
性堅貞淵如止水之不波斷若精金之能割自
爲邑令以及南曹擢寘外臺俾視學政奉公砥
節謝苞苴竿牘之私守已俟時絕傳遽拜除之

竇十年高臥一旦升華睠顧親闈豈忍絕裾而
出倉皇國恤遂不俟駕而行正色立朝如猛獸
之衛藜藿夙夜謀國猶行旅之憂負擔惟其誠
結于中是以義形于色茲以覃恩授具階於戲
汲黯抗論則淮南寢謀干木踰垣而秦人偃息
爾尚勉思夫正國行且收效于折衝服乃訓辭
欽哉勿替

父時霖原任文林郎四川叙州府高
縣知縣封奉政大夫南京兵部車駕
清吏司郎中加贈中憲大夫太僕寺

少卿

制曰士有試于一命屯膏不施而光大于其子
匪獨積習名教有開必先挹彼注茲天亦以著
廉吏之報焉母謂廉吏不可爲也原任具官封
具官某乃具官某之父文章炳蔚德性溫文發
跡賢書分符蜀地脂膏不染首周官廉善之稱
襦袴有聞最漢吏循良之等懸車致仕歸休乎
一畝之宮僂首受書遺子以一經之業率繇家
訓惟我賢臣環堵蕭然坐客之寒氈未改門庭
寂若傳家之廉石猶新睠茲黃髮之賢契我緇
衣之好是用贈具階官厥考作室豈曰莫爲之
前其子和之是以沒而不朽

母馬氏加封太宜人

制曰白華之詩孝子相戒以養也然而必以潔
白爲義則孝子之所謂養者蓋有異焉今吾賢
臣家有壽母白華之養再見于今余深嘆之累
封宜人某氏乃具官某之母淵懿可度柔嘉有
章椎布練裙却華丹而不御衡門泌水甘清白
以相安是有素風施于令子守身無點養志有
聞夕膳晨餐菽水致潔馨之養來歸燕喜飲御

皆孝友之朋是豈非當世之美譚而清朝之盛事矣乎茲加封爲太宜人令妻壽母洵未艾于頌圖文駟雕軒誠何羨于古昔

太僕寺添註少卿熊明遇授中憲大夫

制曰朕眷顧疆宇寤寐俊賢願得瓌材任重之人以建經營告成之業却騏驥而不御人皆歎之聽輦鼓而興思吾有望矣具官某謀猷膚敏器縕純明蔚有君子之文兼通當世之務而自起家邑令奮筆諫垣政邁等夷言多補助出自

瑣闥不薄外藩風力愈修槃根盡解頃者人才隕隳國事助勦惟爾之能效在已試欲付以遐衝之寄人皆曰賢先置之禁近之閒夫然後用乃以覃恩授具階於戲惟靜而共可以明德惟深與幾可與盡神材周于五行用乃不匱氣備于四序志乃不盈益勉自修以荅民望無忘休美服我訓辭

妻朱氏加封恭人

制曰爲我志義之臣束修砥節必有賢明之助焉夫婦之誼同于賓友詩之所以賦彤管也具

官某妻封孺人某氏溫柔顯靜得媿君子作其
內治壹以儉共爰自于歸以及宦成晨昏之儆
不替終始茲加封爲恭人服我訓辭比于圖頌
禮衣編服終當女加

父儒先贈文林郎浙江湖州府長興
縣知縣加贈中憲大夫太僕寺添註

少卿

制曰朕聞合抱之木不生于步仞之丘千金之
子不出于三家之市國之元氣發爲賢才邈其
家風必有原本贈具官某乃具官某之父志節

礪砢風氣激昂身致千金而不以居積射利澤
及三黨而不以施予取名以奇偉倜儻之人修
退讓君子之行徒豐厥德不羸其躬施于後賢
善繼爾志疎節闊目故知爲大廈之材駟馬軒
車庶以信高門之願是用贈具階官旋觀晝日
之錫蔚爲長夜之光國猶有人爾復何憾

母王氏贈恭人

制曰古之女子莫不有左圖右史之訓珩璜琚
瑀之規故能蔚爲母師克成賢子朕加恩人母
原本慈訓蓋尤寵嘉之封太孺人某氏乃具官

某之母柔嘉可章淵懿有度發言光于訓箴動容資于典禮異糧宿肉敬事罔愆夜績晝春劬勞匪懈殉夫歿世鬻子孤生針縷之勤不忘于垂老魚菽之祭尤儉于官成居然女史之風茂矣娠賢之德茲加贈爲恭人於乎令妻壽母固已生而發聞彤管漆書蓋將沒而不朽

太僕寺少卿杜士全授中憲大夫贊

治尹

制曰太僕卿貳國家用專理馬政與古稍異然書稱僕臣之正詩頌我馬之臧自非秉心不回

邦之司直其可與于茲選哉具官某風操端莊訂謨經遠作令楚淝治行籍甚如玉在珮動必有聲迨登諫垣益著令聞憂國之心有悴其容便時之策不啻出口秉金聲玉色之姿著疏穢鎮浮之望朕顧瞻周行擢貳大正蓋非徒以歲月叙進而已也而爾果能淵塞自將交脩不逮精詳辨馬物之屬彊敏控畜烙之弊朕甚嘉焉茲以覃恩授具階夫兵興以來需馬甚急虜騎疾如風雨而我馬虺隤不能戰又牧監非不錯置也而內地苦乏馬此皆爾之事守也爾尚悉

乃心力以攸厥政汧渭之盛在吾郊垌予亦何
愛于康侯蕃庶之錫乎爾其懋哉

妻施氏加封恭人

制曰清公純壹之臣乃心王事者其退食委蛇
室家相貳之私人主亦有以知之矣具官某妻
封孺人某氏秀于閨門動以儀法珩璜之訓以
勗子孫布素之風以敕僕御爾夫之能其官爾
勞懋焉茲加封爲恭人於戲婦人之相助其夫
也同于賓友人主之省視其臣也近于戶庭風
俗有不美而天下有不治矣乎

父宗翹先贈徵仕郎刑科給事中加
贈中憲大夫

制曰書稱堂構播穫所以教爲人子者至矣雖
然作室與菑獨非厥考之責也與封具官某乃
具官某之父彊學勵行質有其文屯膏不施以
昌其後肯構肯穫蔚爲名卿爾有子矣然而本
仁祖義爾之底法旣勤而讀書纘言爾之望歲
良苦矣予其可以忘所自乎是用贈具階官夫
生不逢時而身食其報沒又加渥焉爾豈知其
所使然乎詩不云乎愷悌君子神所勞矣

母唐氏加贈恭人

制曰麟趾之詩序以爲闕睢之應蓋因公子之信厚而原本于后妃也贈孺人某氏乃具官某之母祖風綿邈儀法肅明腆洗致養洽比逮于里鄰羶薌薦嘗和氣藹于媪御發其長祥篤生爾子正色斂容而不履不踐之德人皆望而儀之則豈非爾之胎教者周而娠賢者至與茲加贈爲恭人朕思致成周之盛治仁及草木爾之遺休其未艾哉

太僕寺少卿史弼授中憲大夫

制曰頃者屬夷稽誅河東陷沒朕拊髀興歎願與卿大夫洗四郊多壘之恥凡公忠憂國之臣有言入告朕必知之具官某德器溫文風操廉辨起自邑令躋于西臺正色寡言而班行肅括登車攬轡則江楚澄清家居有年體望滋茂迨罔寺服官之日正軍書交至之時而爾乃忼慨憂危指陳戰守崇墉樓櫓屹立目前大海重關迴環掌上蓋其氣吞醜虜直欲章天討于出車矧乃職在庶蕃何難整軍容于牧馬乃以覃恩授具階於戲匈奴未滅何以家爲以爾之志其

肯忘茲戎索而服我寵詞乎余不以國方蹙土而廢我彝章亦不以虜未渡河而忽爾儆戒有臣若是惟良顯哉

妻李氏加封恭人

制曰惟我勞臣必有賢耦蓋庭屏之不飭推謫之無時牽內顧以縈心顧前期而惰氣此北門之刺所以作也具官某妻封孺人李氏嫻于內則秉是壺彝指龍具以厲功名長塗云邁問雞鳴而資告誡短檠相依膺仕有年御窮如故闔門如洗清風可激于埋輪言閭不踰淑慎有同于焚草茲加封爲恭人佩此素沙之服壹以爲儀故知荆布之風終焉不替

父洪達先贈文林郎廣西道監察御

史加贈中憲大夫太僕寺少卿

制曰記有之士庶人有善本諸父母而况于卿大夫乎朕作求世德發皇幽潛教必有初其敢忘報贈具官某乃具官某之父彊學有聞負奇不偶醇風扇物蘊孝友于家門和氣襲人解紛爭于閭黨終身數卷人曰君子之儒教子一經使爲清白之吏紹其素業爲我清卿十載孤貞

藉用白茅之舊累年建白發揮青簡之遺是用
贈具階官用酬塗墍之心爾有子矣庶叶屋楹
之望國有人焉

母吳氏加贈恭人

制曰楊雄不云乎女惡華丹之亂窈窕也士淡
然忠貞白首一節斯不以華丹亂者乎非有母
師誰與成之贈孺人某氏乃具官某之母含章
可貞柔嘉維則饋祀而公姑交賀持家而媪御
咸宜攻苦服勞迄無寧日御窮屏貴遂以終身
朝壑暮鹽尚閔告勞于田峻輕綃綺縠終嘆爲

蠹于女紅泊然儉德之可師宛爾素風之不替
茲加贈爲恭人永以詒女史之範不徒成爾子
之名

尚寶司少卿袁可立授奉直大夫

制曰我皇祖化成久道遐不作人摧挫有時
扶養無已留畀皇考迨予冲人闕門登庸猶
恐不及具官某風簡清真文章炳蔚祥刑惟允
執法有聞乃以震門之言旋于削籍之譴口不
言事恥漢人部黨之名退不忘君有楚尹毀家
之志越朕嗣服起自田閒奉英蕩以周旋人咸

想望其風采歷殿陛而進止朕尤屬目于老成
睠茲典瑞之賢永懷仍几之託晉爾卿佐爲我
典刑遂用覃恩授具階於戲凡今一時起家之
人率多兩朝懋遺之老白首完節爾尚念皇
祖養士之仁黃髮在廷余敢忘古人求舊之義
勉旃夙夜服此訓辭

妻宋氏加封宜人

制曰主聖則臣直故思志義之臣家人利女貞
尤賴賢明之助具官某妻累封安人某氏蘭行
彰信蕙風滿盈當相夫膺仕之時能自勵御窮

之操及乎一朝抗疏二紀歸田風雨饁耕不廢
丘園之禮燈窗課讀宛如賓友之期使爾夫幸
偕隱之有人期沒齒而無憾惟此女士無愧古
人茲加封爲宜人服茲翟茀之榮益念縞綦之
素

父淮先贈承德郎尚寶司丞加贈奉
直大夫尚寶司少卿

制曰好日子之能仕父教之忠親之成其子也
記曰士庶人有善本諸父母子之成其親也贈
具官某乃具官某之父行無考類言有表坊以

孝友淑其躬居家無子弟之過以忠義勉其子
過庭多長者之言克生直臣事我皇祖于嚴
譴而不悔固云無忝所生遜盛名而弗居亦曰
皆本諸父是用贈具階官於戲沒祀以仁者之
粟奚五鼎之足云求忠于孝子之門庶百世以
不朽

前母陸氏加贈宜人

制曰忠臣不賴寵而事君孝子不怙愛而慕親
故禮有舊君之服而傳垂如母之文國家異數
霈恩推及前母教孝勸忠率用斯道贈安人某

氏乃具官某之前母行應箴圖動循珩珮新昏
燕爾中道棄捐哀哉若人命之不淑乃無子而
有子得因親以及親比及一年遂膺再命茲加
贈爲宜人於戲以爾子之于爾毛裏漠然栝棧
何慕顧此禮編之錫曾不閒于烏烏之懷是知
簪履之遺益無解于龍胡之痛用章誘勸非我
恩私靈其有知尚克享此

母安氏加贈宜人

制曰爲人母者或賢而不著于綸綍或貴而不
昭于管彤其能兼而有之幾何人哉贈安人某

氏乃具官某之母蔚爲女士實惟母師機絲閒
讀誦之聲七著著平反之教迨抗章之怒未測
而偕隱之願不違歡然舉觴喜常在于目下慨
焉太息想齊名于古人宜爾娠賢作吾遺直茲
加贈爲宜人瀧岡之表未艾于今介山之封有
光誰昔

尚寶司少卿王之寀授奉直大夫

制曰朕嗣服以來念我先帝往居儲副備歷
憂危惟昔年調護之人多今日登庸之士龍胡
莫逮鴻羽日新顧彼周行爲之愾嘆具官王之

寀風期魁壘志節激昂歷邑宰而稱能在刑曹
而有執乃東朝覲軌之日正九廟震驚之秋
爾猶能窮究要辭抗言奸狀我皇祖是以有
慈寧之召而舉朝得以釋宗社之憂惟爾孤忠
著于易世還追奪之恩命寵以訓辭起淪棄之
餘生置之禁近蓋隻身嚴譴固聖朝養士之深
仁而一旦召還亦皇祖安儲之本意致其忠
愛爾方感痛于山陵思其著存余尤矐顧夫簪
履乃以覃恩授具階於戲惟靖共爾位可以繼
前修惟夙夜在公可以終後譽尚終念生全之

德其無忘死諫之時欽哉

妻孔氏加封宜人

制曰朕觀古忠臣志士身名坎壈而妻子流離未嘗不惻然傷之今吾追念先朝召還遺直而分榮及其室家國家寬大之恩顧不著與具官某繼妻封安人某氏女圖母越婦道可宗相夫子以能官奉先姑于篤老迨抗章嚴譴之日正闔門皇恐之時環堵篝燈晤對有同于賓友田園饁餉沒身何羨于榮華是以雷風之震驚不廢瑟琴之靜好國論既定閭範滋章茲加封爲

宜人爾其言念國恩黽勉內治砥節必期于衰白立名相勸于汗青服我訓辭永綏福履

父登洲累贈承德郎刑部浙江清吏司主事加贈奉直大夫尚寶司少卿

制曰國家激勸臣工莫先恩命以追奪爲辱則尤以補給爲榮至于牽復未幾而褒用相逮度越彝典佩服異恩移孝教忠顧不美與累贈具官某乃具官某之父天性剛方人倫篤厚抱遺經以究終始業不在于蟲魚負俠骨以游里閭志安知夫鴻鵠慨有大節傳之後賢惟茲法署

之危言實乃家庭之遺教奮一身以爲九廟子
可下報其先人禡一命以及九京父亦何憾于
沒世迨國論之既定肆恩命之載頒試觀日
月之昭回言念雷霆之摧擊人心不死何待三
錫以爲榮天道有知豈曰十年而不復是用贈
具階官於戲是父是子惟孝惟忠徵于本朝固
當垂之掌故爲觀後世尚亦視彼冊書

母趙氏加贈宜人

制曰古之賢母劬躬燾後其後必有砥節立名
之人以顯揚其親我有賢臣率由慈訓贈安人

某氏乃具官某之母言不出閩德宜爾家黽勉
相夫有雞鳴儆戒之義恩勤嚮子有螺贏負化
之仁旣娠賢而有聞遂收華而長逝惟爾令子
茂著忠賢奮爲死諫之臣志義有光于彤管祀
以仁者之粟顧養何慙于白華茲加贈爲宜人
於乎邇今古之榮名惟忠孝爲不朽不獨著珩
璜之教亦以垂中綢之規

尚寶司卿歸子顧授奉政大夫

制曰尚寶之卿掌司符璽夾侍殿廷其班行最
爲清切非其人名德老成宜在帝左右不以處

為具官某德器溫文訂謨經遠初在綸省已謝
聲華旋登掖垣益章體望蓋爾之正直忠厚本
諸先民而吐剛茹柔乃其素守當徑實奔趨之
日遵彼周行處羣言沸羹之時默為楮柱縣歷
滋久簡用惟新列在清卿職司尚璽出入殿陛
還顧瑣闈獻納之班回翔禁嚴彌覩夙夜在公
之節甄陞惟允資望幸先乃以覃恩授具階於
戲世變風移所貴得沉實守正之士尊賢求舊
庶幾倡靜共爾位之風尚為吾之典刑以勉須
夫不次欽哉

原任左春坊左庶子兼翰林院侍讀
馮有經贈禮部右侍郎

制曰我 先帝儲闈日久育德通儒踐阼未幾
追懷舊學德音不遠山陵告成顧瞻懷思潛然
出涕聿舉追恩之典以終憑几之言咨爾營魂
聽余申命具官馮有經湛涵經術蹈履中和蚤
踐禁林拔自 聖祖遂叅講幄侍我 先皇誦
文王世子之篇有碑寢門之孝非唐虞三代不
道無忘東序之規啓沃有聞勤勞茂著胡收華
于朝露徒齋志于辰猶昔在 先皇為之三嘆

惟余冲子悼以百身是用游越宮僚峻副宗伯
漏彼下泉之澤蔚爲儒者之光於戲涕泗何從
言念春宮之舊事話言猶在追懷青殿之執經
尚與享于在天誠何憾于入地靈其不昧鑒我
盡傷

諭祭原任左春坊左庶子兼翰林院
侍讀贈禮部右侍郎馮有經文

惟爾蚤踐翰苑游陟桂坊事先帝于春宮若
甘盤之舊學蓋亦馮翼孝德之士不獨章句誦
說之儒回翔有年奄忽長逝霜天雪夜尚想遺
心鶴禁龍樓遂成陳迹悼弓劔之已往念簪履
之如存睠我先朝式章異數賁茲新窆祭以共
牢尚其冥靈歆此嘉饗

下葬文

惟爾望茂宮僚勞深講幄寵數追錫日月有時
爾尚收斂營菟追趨弓劔其從與享長侍先
皇居此幽宮庶幾不朽

原任總督陝西三邊軍務兵部尚書
兼都察院右副都御史贈太子少保
謚恭襄石茂華追贈資德大夫

制曰闕闕在朝永念鼎鍾之績羽書旁午式勤
鞀鼓之思無競惟人逝者可作睠言舊烈敢告
治庭具官石茂華志慮忠純材術膚敏踐更中
外歷著風猷蹴島寇于維揚捍強胡于汾石入
登樞貳籌邊屏幃之間出總元戎宣威區落之
外上首虜者二十餘章鬪羗夷者七十一族再
臨秦隴俄然星隕于營中一望節旄尚爾風驚
于塞上睹茲鈴索之警視彼冊府之勳矧予將
帥之臣亦有箕裘之胤乃以覃恩追贈爾資德
大夫錫之誥命於戲肆承平之日久致戎索之

漸隳黑水白山尚留殘孽旄頭畢口未斷夷氛
起冢象祁連猶恨匈奴之未滅將星高太白誰
當長子之帥師推九原猶視之忠稱一人拊髀
之意惟靈不昧服我訓辭

原任太常寺卿洪文衡贈通議大夫
工部右侍郎

制曰朕簡召遺逸登用老成蓋將網羅武宣之
人材修舉成康之政治虞門載闢黃髮在廷其
不幸而淪亡余何愛于贈卹具官洪文衡學術
醇正風操端莊當束髮以登朝迨白首而壹節

奉公體國殆庶幾知無不言言無不爲蹈道潔身則可謂三揖而進一辭而退迨我初服載陟清卿雖回翔卿寺之間實蔚爲本朝之望論不阿世抗議以存祧廟之規義深愛君盡瘁以蕝園陵之禮方期枋用胡不憇遺撫先朝梓漆之材慨漸凋于再世念夙夜寅清之德恍或在于周行爾生平懷報國之心持以入地余一人懋厚終之典書而納棺是用特贈通議大夫工部右侍郎錫之誥命於戲士有令名至身沒而論定國之彝典蓋生榮而死哀惟朕言之有聞庶逝者其可作營菟不昧尚服享哉

原任南京吏部稽勳清吏司主事安

希范贈光祿寺少卿

制曰爲國以養士爲先養士以厲節爲本昔我神祖野多遺賢蓋將鬱積一時之材以爲子孫百年之用如鳳麟之服猛鷲若珠王之茂山川迨我新朝疇咨故老或有淪沒余深嘆焉具官安希范德行溫文風節凝遠抗章郎署力陳社稷之言削籍編氓固守丘園之賁窮而譚道誠畢世以何求退不忘君蓋沒身而後已方當召

用竟不假年睠彼遺民至于今日風霜閱歷徒
知松栢之心節目枵喬莫竟梓材之用爲之一
涕胡不百身特贈光祿寺少卿錫之誥命於戲
考完節于生前蓋棺始定表令名于身後簡冊
猶新尚念我 祖百世之仁庶亦慰爾生平之
志

四川叙州府興文縣知縣張振德贈
光祿寺卿諡烈愍

制曰比以疆圉多故奔潰相仍余欲僇死而施
生責以致命必先憫忠而厲節教之事君庸峻

恩章以昭激勸具官張振德入孝出弟經明行
脩爲吏有儒者之風居官以保障爲事屬逆會
之作難數郡風靡遂登陴以授兵孤城斗絕力
戰無援盡室自焚哀哉一死之堅貞烈于猛火
壯矣闔門之婦孺皆爲國殤惟吾謀軍師國邑
之臣率多保身軀妻子之輩誰無百口甘視息
以偷生視爾一門尚汗顏而愧死是用易名烈
愍峻秩司光致祭歲時立睢陽之廟世官環衛
字羽林之孤異數以盼寵錫斯備於戲生吾所
欲矧二十餘口赴義如歸國猶有人蓋二百餘

年養士之報庶幾精爽尚克顧歆

自兩制專屬館閣而贈祭誥文及武官恩命誥勅房辦事者據爲職掌天啓元年余當外制中書譔馮庶子贈官誥鄙俚不典有抱明月而長終之語余信筆爲改竄自後大臣子弟欲表章先德相率來請余受其辭而却其幣中書恚余侵官往愬於中堂中堂唯唯余不與置辨也迨今上初褒贈應山諸公制詞皆出詞林歷數年而吾邑許祭酒以譔高忠憲制左官蓋中書

挾摘其制語獻之韓城藉手以報東門之役韓城喜于斥許初不問故事云何而許亦未悉余之爲始禍也 穆廟初高文襄當國歸熙甫以僕丞管制敕一時贈祭文爾雅可觀厥後辦事者多用乙科闌入閣中亦視爲故紙不復簡括制詞日陋王言日輕閒與諸老言之相視目笑而已於乎亦可爲一慨也壬午長至後五日記

牧齋初學集卷第九十四

外制四

工科給事中魏大中授徵仕郎

勅曰朕運撫多艱助求小疵歷選賢俊充弁諫垣安得公忠體國之臣參錯其間使風聲凜然而國是以定與具官魏大中恭敬溫文弘深肅括蔚爲民譽久在使垣周爰咨諏載驅英蕩瑣闡晉列封駁有聞蓋爾有正色寡言之風而懷淡然無我之志受寵有憂色納忠多苦言居無墮替之容進無扳援之黨先資之獻視彼周行

而如結之心形於人告朕有嘉焉乃以覃恩授
具階於戲闢門伊始納牖惟人以緇衣巷伯之
思勵其素節以彈冠振衣之想立我新朝誦虞
人之箴爾尚輸忠於辛甲以鄭公爲鏡余將取
法於貞觀益勉辰告之猷無負夕郎之拜

妻錢氏封孺人

勅曰士淡然孤貞窮通一節何暇問室家乎然
而北門之歎未免上聞則相貳之賢蓋亦砥節
之資也具官某妻某氏頌圖叶德棗栗告虔奉
白髮以服勞辛勤生死却丹華而攻苦黽勉歲
時追通籍之有年益負屏而相勵夜行多畏凜
然行露之防辰告有章宛爾因風之儆如茲媿
德何靳分榮茲特封爲孺人闕狄之章尚頻仍
於殊錫素沙之德知不改其生平

父邦直先贈奉職郎行人司行人加
贈徵仕郎工科給事中

勅曰士有沉冥沒世身不出一畝之宮而束修
砥行以見於後斯所謂鄉先生沒世而可祭於
社者與朕思式而表之矧其有子贈具官某乃
具官某之父人之逸民天之君子內行純備儼

介圭之有章至德可師扇和風而被物因心制
行非有使然博喻爲師是亦爲政乃其式穀於
爾子蓋皆模範以古人青簡猶新指鬚眉而激
勸丹心未死按圖像以考求攻木之教有聞匪
石之心不改是用贈具階官於古有曜宜揭德
以振華非朕敢私用厲世而磨鈍

母蔣氏贈孺人

勅曰敬姜不嘗稱乎君子能勞後世有繼夫愛
其子而勞之不若勞其身者之以身教也爾某
氏乃具官某之母性閑圖史訓奉姆師操茶蓼
以爲心習井舂而作苦抱絲貿布勤敗杼以相
夫并食易衣市遺編而教子劬躬已逝娠賢有
聞封駁禁闈尚想指陳於畫荻隱憂瑣闥終懷
手澤於斷機茲特贈爲孺人庶幾釋孝子之悲
亦以章女宗之德

工科給事中方有度授徵仕郎

勅曰朕博求俊乂廣置言官班行載盈臨朝發
歎思見正色讜言之士以幾鎮浮疏穢之風苟
得其人中我茲選國有彝典先以訓辭具官某
風操端莊言行謹直肅然清廟之器粹然孚尹

之姿爲令廉能冠於澤潞報政優異擢在諫垣
旣明且清其言不愧乎先正允文而靜立朝有
慕乎前修君子之德風曰不流而不倚吉人之
辭寡蓋有脊而有倫乃以覃恩授具階於戲國
家以得人爲彊若虎豹之衛藜藿以一言取重
若鴈玦之解嫌疑故崔公發言則淄青慙服而
汲直在內則淮南寤謀爾其以靖共正直爲倡
余豈以蜩蟬沸羹爲患欽余時命慎乃攸司

妻閔氏仍前贈

勅曰夫婦之義始乎人倫故谷風有御窮之悲

而鷄鳴致偕老之祝朕於臣子蓋深歎之具官
某妻贈孺人某氏秉是壺彝作其內治夙興夜
寐躬濯概以有虔朝 壺暮鹽服井春而不解吁
其悲矣胡不永年中夜傍徨尚想牛衣之感涕
日月逾邁誰其翟第以來朝茲仍贈爲孺人尚
有聞於管彤知無憾於宿草

繼妻張氏仍前贈

勅曰爲吾志義之臣服官廉辨有事殿中則其
相助之賢攻苦而食貧者亦已勤矣朕有愍冊
其何忍遺具官某繼妻贈孺人張氏旣靜而顓

終溫且惠箴圖之訓學於先姑洗腆之供及於
再世竭黽勉而相讀珥無光輝躬操作而之官
衣猶穿弊光塵已往儀度有存治業寢門儆戒
尚思夫行露上章瑣闥風規彌感於視星茲仍
贈爲孺人不獨慰夫子之心亦以章女宗之範

父恒先贈文林郎山西潞安府長治

縣知縣加贈徵仕郎工科給事中

勅曰國計莫先於樹人家修必本於種德樹人
如積穀以旣穫爲成功種德如力田以勤敷爲
能事肆我瑣闥粵有賢臣原本先人著之書命

贈具官某乃具官某之父器資拔傑德性溫文
孝養厥親牽車牛而服賈好行其德解服驂以
卹貧篤厚深中與人無厓岸之異感槩立節行
已在儒俠之間不羸其躬以昌厥子高吾門可
容駟馬旣有徵於里閭度其旁可置萬家誠何
恨於泉壤是用加贈具階官於戲或源或委宜
食報於先河爾熾爾昌尚流光於後裔無劍

母程氏仍前贈

勅曰麟趾之詩咏公子信厚之德而原本於后
妃國家之治所以仁及草木也我有賢臣追念

慈訓娠賢燾後余寵嘉之贈孺人某氏乃具官
某之母天性鍾慈女圖叶矩易衣并日儉共迄
於沒身洗腆齋盛勤勞萃於十指慈和藹於媪
御顓靜化於閨門發其長祥篤生爾子無險詖
私謁之念似其母儀有不踐不履之仁本於胎
教茲仍贈爲孺人關雎之應既有聞於爾身麟
趾之徵尚茂著於爾後

刑科給事中薛大中授徵仕郎

勅曰有事殿內之臣吾所爲職諫諍資規益者
也苟得其人咫尺丹陛執簡却立朝右屏息而

人主動容其責任顧不重與具官某器資拔傑
風力肅明早以長才試於爲邑屢居上考擢在
諫垣當羽書交至之時兼國論紛紜之日悉心
條奏信志敷陳畫地聚圖有言必底於可績正
繩直筆無論不期於矯時甫踐月請之班已著
日聞之効乃以覃恩授具階在昔三原粵有前
詰奏牘流播炳若丹青爾生於其鄉亦有瞽宗
之思乎惟篤誠可以繼前修惟博達可以經世
務爾必勉之無姑求賢於世之君子而足也則
余汝嘉

妻秦氏仍前封

勅曰周官之以六計弊羣吏莫不以廉為主然而士君子之能廉多始於家室北門歎交謫而家人利女貞斯可以觀矣具官某繼妻封孺人某氏環珮應圖衡規合德恭大慈小朝壘暮鹽自誓以裙布之風佐夫爲清白之吏突煙朝冷坐看金甌之生塵鈴索夜闌共喜寢門之如水清班旣踐內美滋彰茲仍封爲孺人祇服訓辭永綏福履益勉夜央之間用襄辰告之猷

父約封文林郎河南歸德府寧陵縣

知縣贈徵仕郎刑科給事中

勅曰易稱積善餘慶傳言德厚流光故陰德之門必高於後而祥刑之策或授於先挹彼注茲蓋天道使然也封具官某乃具官某之父飭躬厲行陳義本仁矩行規言師孝友於千古春華秋實備文行於一身折節以爲善於家傾貲以好施於國流離載道望之如歸饑寒塞門待以舉火敦六行以重任恤旣以仁厚起家本六計之弊廉能又以清白訓子凡此象賢之美誰非燕翼之詒是用加贈具階官於乎鴻羽爲儀大

顯於堂坊之後虎賁猶在試觀於殿陛之間

戶科給事中史孔吉授徵仕郎

勅曰昔稱王仲舒爲拾遺秀出班行乃動帝目
蓋有事殿內之臣密侍瑣闥風流吐茹皆有獻
替非獨能言而已具官某經術湛深器縉純茂
發跡賢科兩宰劇邑所至治理風績炳然迨登
諫垣封章屢上論事以和衷爲準籌邊以竭澤
爲憂策皆便時言可底績至於進止雍頌敷奏
詳雅如良璧之有卮而精金之有聲朕臨朝顧
視念彼周行先民之風藹然猶在若爾者可以
爲天子法從之臣矣茲以覃恩授具階夫給事
中在帝左右古多用履素立德者爲之而後世
徒以爲言官而已朕今欲使封駁凜然殿陛動
色諫官之勢不輕而朝廷日重其所以望爾者
遠矣靜共爾位勿替朕命爾其念哉

妻蔣氏仍前封

勅曰婦人之貴從夫者也倘從其貴不從其賢
則翟弗之榮不光而縞綦之思彌苦已具官某
妻封孺人某氏環珮應圖琬琰合德異糧宿肉
則舅姑忘貧荆布操作則家人屏貴惟茲冰玉

之姿迄無初終之異夫婦之間宛如賓友媿賢
如是不已難乎茲仍封爲孺人服此休命不替
素風蕭然瑣闥之游何異鹿門之隱

父餘道先封文林郎福建建寧府崇

安縣知縣加封徵仕郎戶科給事中

勅曰師道立則善人多善爲人師者有相於國
家之養士者也而食報於其後又何疑乎封具
官某乃具官某之父孝友成性溫栗比德家傳
載廉之石菽水爲歡庭生交讓之木冠衣相代
嗟數奇而不偶能博喻以爲師不收榷楚之威

益衍菁莪之澤遐不作人施及其子今爾子繼
言勵行蔚爲寶臣是則爾之成勞也是用加封
具階官爾方白首窮經豈知章服之榮有以加
於韋布乎先河後海國家崇本之道宜爾爾其
善承之

母潘氏仍前封

勅曰皇考庚戌之歲子大夫登於朝者不爲
不多矣官於禁近者少也官禁近矣父母俱存
者又少也兼而有之矣當霈恩之際值稱壽之
日者抑又少也於戲是不惟人之全福家之積

慶不可多邁而天地休明之氣亦有限焉封孺人某氏乃具官某之母出自德門備有儀法今爾子爲青瑣之臣而爾與夫俱黃髮之老吉祥善事駢集一門可謂盛矣夫德者福之基也家者邦之基也朕旣已觀德於家又以徵天地休明之氣朕甚憚焉茲仍封爲孺人朕方有意於養老乞言之事而侍養之臣祥祉如是其尚善持之思其所感應召致也則豈惟一家之慶哉

兵科給事中李遇知授徵仕郎

勅曰乃者東夷不靖河東失守徵發填委朝野

繹騷議者率以謂議論不省則無以責成功封駁不嚴則不可振積習兵垣得人而疆事思過半矣具官某風力肅明機用周敏初爲健令在我近畿蔚有令名躋於諫署班行秀出如衝牙之有聲糾覆精明若操刀之能割至於論兵事之疏尤多切時務之言指顧遼山渝水之間可以坐而籌畫敷陳出車命將之事庶幾立見施行若爾者可以爲兵垣之選矣乃以覃恩授具階自兵興以來道謀孔多戎律剗敵夷耽耽志日在我我睽睽目不在敵夷所以逞我所以感

也實爾之言無忘國恤掖垣瑣闥之地皆枕戈
坐甲之人人咸以遼爲事斯遼事辦矣爾其懋
哉

妻王氏贈仍前封

勅曰讀小戎之詩而知秦之婦人女子皆能先
國恤而後室家斬然有士行也遺風有存予其
恡此贊冊具官某妻封孺人某氏動稟詩書言
光箴訓饁耕佐讀甘麤糲以御窮荆布之官比
素絲而叶德收華已舊錫命維新風動掖垣誰
問封章於右省霜清板屋空懷茵韞於西戎茲

仍贈爲孺人尚其默贊夫德音用以有禪於王
事

父友竹先贈文林郎直隸大名府東

明縣知縣加贈徵仕郎兵科給事中

勅曰傳曰子之能仕父教之忠夫教非其辟耳
之謂也生而有氣誼可見歿而有風骨可詒式
穀之似有深於提耳者與贈具官某乃具官某
之父學有根柢言成文章驥足未展於名場燕
翼每勤於喆嗣以任恤教鄉里肅如鼙鼓之招
以德義愧囂浮嚴於榷楚之撻用爲庭訓施及

官方啓迪有聞規摹滋茂是用贈具階官於戲
再世而昌既有徵於播穫九原可作斯無愧於
典型

母某氏仍前封

勅曰臣子勤勞王室砥節首公進而有所養之
思退而有燕喜之慶一悲一喜未嘗不回翔錯
互也國家蓋有以慰之封太孺人某氏乃具官
某之母躬傳茂矩性稟深慈機絲攻苦於一身
膏火佐勤於兩世今爾子既顯融瑣闥而爾尚
優游板輿惟榮與壽可謂兼之矣於戲王于興
師爲人臣者咸有無衣之賦不遑將母爲人子
者寧無絕裾之悲爾既勉其子以事君余當因
其子以念母茲仍封爲太孺人尚其彊飯以迓
餘休母重倚閭以牽內顧

兵科給事中明時舉授徵仕郎

勅曰國家六科之設名應六曹東師之出兵垣
尤重籌邊論將以封駁爲折衝非真心弘濟之
臣曷與焉具官某心事樸忠局幹縣遠出宰西
江報政北地爬剔疾苦扶養小弱可謂良吏矣
頃者東事方殷兵食坐困爾新從西方來封事

數上勾稽夷虜有表餌制禦之謀劈畫戰守有
畫地指陳之狀朕東顧旰食每三歎焉茲以覃
恩授具階夫言官筆戰於廟堂邊臣心戰於疆
圉此今日之通患也使言官之畢牘與邊臣之
烽堠胥用以向賊而不恤其它東方豈足慮乎
爾典司兵垣且憂遼事良苦朕將倚以辦遼矣
爾其念哉

妻唐氏仍前贈

勅曰國家霈恩推及家室死生契闊咸卹其私
具官某妻贈孺人某氏溫恭媿德匪勉御窮節

衣量腹以事尊章風雨雞鳴以相夫子而不得
與君子偕老翟第以朝命也如何爲之永歎然
爾夫不以絲枲而忘管蒯之思國家不以宿草
而遺采蘋之德則爾亦可以無憾矣茲仍贈爲
孺人膺國之再命我有訓詞從姑於九京爾其
與享

繼妻王氏仍前封

勅曰古之賢婦克相其夫者多明識道理有忠
君憂國之思焉不徒以織紵饋食爲能事也具
官某繼室封孺人某氏育德名家作嬪良士撫

孤孩有莫辨之仁事君姑有在側之孝至於心
念國恤勉其夫以急君而身留子舍代其夫以
事父割兒女婉孌之私成丈夫慷慨之節若爾
者可謂女士矣茲仍封爲孺人爾夫方拮据兵
垣指畫邊事爾尚益庀內政贊我諫臣爾亦與
有成勞哉

父誥先封文林郎江西吉安府廬陵
縣知縣加封徵仕郎兵科給事中

勅曰予觀於土風巴之人有好古樂道之詩焉
今其遺民猶有存者封具官某乃具官某之父

被服儒素規矩古人事親而飲水盡歡教弟而
膏火無閒爾子通籍起家而爾終守幽人之吉
退修長者之行蔬食布衣宛然野老渥顏白髮
話彼平生好古樂道誠無愧焉是用封具階官
於戲疏榮霈恩國有彝典然白駒空谷之思亦
攸寄焉非爾不足以與此

母王氏仍前贈

勅曰嘉穀旨酒可以養母此亦巴人之詩也朕
推恩臣下循覽怙恃之間蓋愴然傷之封孺人
某氏乃具官某之母相夫有佩韋之順教子有

宿火之勤黽勉劬勞不媿女史爾子出宰百里
爾能封鮓訓廉加飯問獄三年有成猶及見之
今爾子方致身青瑣而爾已歛影黃墟話言不
遐圖像空設良足悲矣茲仍贈爲孺人庶幾寸
草之心足慰樹護之慕

福建道監察御史周宗建授文林郎

勅曰昔在我 孝廟扶養言官開受讜論易世
之後忠厚正直鬱然成風朕嗣服以來追懷先
正慨然有典刑之思焉具官某得南方文學之
華抱先正先憂之志膏雨之政浸灌淅西游陳

內臺今問滋茂爾旣博通經術貫穿世務而又
本諸憂國之心發以便時之策籌邊徼而悉要
害辨賢奸以渙小羣朕顧瞻周行省覽封事庶
幾於爾有先正之望焉乃以覃恩授具階爾乃
祖起家 孝廟中著聲南垣恭肅之名于今爲
烈惟恭與肅忠厚正直之表也爾尚祇一乃心
紹衣先德朕將以前烈畀爾爾其念哉

妻申氏仍前封

勅曰二南之風閨門之細事皆所咏歌而罕可
指述此王化之最盛也今安得而見之具官某

妻封孺人某氏淑茂柔明休有華問學於舅姑
以事夫子以爾夫學殖之勤服官之忠則爾之
交儆於旭旦而治業於寢門者其亦可想見矣
乎茲仍封爲孺人其益相爾夫效爾績用以章
明王化亦惟爾之休

父輯符封文林郎浙江杭州府仁和

縣知縣加封福建道監察御史仍前

階

勅曰朕惟人材之難長育有素風流之來彌遠
則弓冶之傳滋大豈可誣哉封具官某乃具官

某之父恭肅之孫孝秀之子慨有大志似其先
人結繩掌故富有腹笥水利兵農爛如指掌非
惟有名士之風蓋亦抱通儒之器抱道不施以
詒其子今爾子竟爾志矣於戲魏公之遺笏代
著清風王氏之青箱世諳舊事風流弘長非爾
其誰是用封具階官爾尚傳述祖德磨切後賢
使爾子之風績克媿乃祖顧不休與

母顧氏仍前封

勅曰吾聞之敬姜曰君子能勞後世有繼然則
古之賢母所以娠賢而教忠者其必繇於此矣

封孺人某氏乃具官某之母家風綿邈儀法肅明言稱先姑服習珩璜之訓無違夫子辛勤簪笏之遺至於斷機之教益勤於學殖而備官之訓不替於宦成式穀有人誥誡彌苦則古之母師無以加矣茲仍封為孺人爾子風猷未艾爾之優游象服往來雕軒固有日矣能勞之報顧不著與

山西道監察御史江秉謙授文林郎
勅曰昔我皇祖儲養諫臣迨於末命除授如恐不及山陵既成人物滋茂朕瞻彼周行蓋不

勝豐芑之思焉而霈恩之典其能已乎具官某經學承家儒術飾吏出宰劇邑蔚有賢聲襦袴之謠有聞膏雨之澤滋潤晉陟臺憲風聲凜然虛已奉公志每存乎交儆盡忠補過心如結於在廷共傳且止之謠快覩巡行之跡顧瞻法從幸有人焉乃以覃恩授具階朕開受言路朝上夕下立維新之朝則當奮被濯之氣居可言之會則當收藥石之功若乃埋輪示威焚草爲慎此衰世之事而非朕所望於爾也爾其悲哉

妻汪氏仍前封

勅曰人臣出宰大邑入陪法從勞於王事而不
得顧卹其私則內助斯重矣具官某妻封孺人
某氏婉婉淑儀儉共令德拮据辟績之苦宛若
儒生追陪膏火之餘自爲賓友居寢門而治業
黽勉中宵視封事而戒心殷勤問夜爾夫得以
一心營職爾有助焉茲仍封爲孺人再命是膺
初勞勿替

父應曉原任四川重慶府涪州通判
先贈文林郎浙江寧波府鄞縣知縣
加贈山西道監察御史仍前階

勅曰木本水原臣子承家之學先河後海國家
追遠之恩具官贈具官某乃具官某之父行馴
簡桺學咀英華廿載入山勵隱居之遠志一行
作吏借宦跡以薄游涪水之歌詠猶存黟山之
藏書殆遍作縣有譜試看廉石之傳荷囊生風
不負羸金之教是用贈具階官嗟斯人之不作
庶可用以爲儀

前母胡氏贈孺人

勅曰數典而忘祖非故也登枝而捐本非仁也
朕比下詔霈恩尤敦篤於原本故臣子之有志

弗信者悉逮及焉某氏乃具官某之前母孝慈
天授共儉少成黽勉備旨甘田之勤閱歷盡糟糠
之苦譬彼開國承家之事實爲荒度草昧之人
實命不猶溘焉先逝逮乎曠蕩追恩之日乃得
均霑後子之封其可愍矣茲特贈爲孺人於戲
覩口澤而思以言乎所生之子見圖像而拜豈
望於不知之人推恩體及夫人情異數不限於
功令爾靈不昧尚服享哉

母汪氏仍前贈

勅曰貞順賢明母儀之所兼重也古之賢母稱

於天下能教其子其可誣哉贈孺人某氏乃具
官某之母被服圖頌不解於身諷誦詩書略皆
上口既能食而能教亦有嚴而有慈是正一字
之舛譌取諸腹笥慨歎千秋之風義教以心師
遂成爾子之名不愧母師之號茲仍贈爲孺人
於戲綸綍之榮滋至而管彤之譽無窮是母是
子厥惟顯哉

廣西道監察御史游士任授文林郎

勅曰朕睠顧東方拊髀太息蓋欲順殺氣以用
兵法文昌而命將而懼未有以稱也我有臺臣

期振國恥慨有大志子寵嘉之具官某學求經
國志在救時自爲令而循良已有聞於當世甫
就西臺之列屬當東事之殷慷慨上書諄復論
事孟江鑑海攬世務於目前餌虜穿夷聚兵符
於尺幅子嘉乃志明試以功遂命爾於彼東南
簡江淮習流之卒身親教練成越人君子之師
用以張吾三軍期於自當一隊爾受命往矣乃
以覃恩授具階於戲自唐宋以來往往用文臣
爲大將朕命爾非小也非寬不可以養人非嚴
不可以御衆非廣不可以集事非斷不可以成

功聽我訓辭著爲紀律朕有後命爾往欽哉

妻段氏仍前封

勅曰易不云乎陰雖有美含之以從王事夫以
從王事臣道也而妻道亦參預焉人臣砥節首
公必得閨門之攸助豈偶然哉具官某妻封孺
人某氏休有華問歸於令人躬洗削以御貧服
素沙而比德爾夫子旣奮身師旅方有外憂而
爾能庀業寢門俾無內顧蓋不惟身甘麤糲量
腹以佐養士之風抑可親執鼓桴向屏以作三
軍之氣所謂以從王事誠無愧焉茲仍封爲孺

人爾其益勤夙夜以相夫子石窳之封朕不遺

爾

父讓先贈文林郎浙江湖州府長興
縣知縣加贈廣西道監察御史仍前

階

勅曰士能詠歌一室抱遺經以昌其後斯已賢
矣矧其慷慨負奇風義弘長大啓其後之人以
勤王事贈具官某乃具官某之父通材膚敏亮
節激昂志在春秋刊訓故專門之學下窮掌故
鄙蟲魚篆刻之文嗟有志而無時終藏器而不

賈肆尚友之心於千古游於酒人韜濟世之德
於一鄉稱爲長者惟而賢子似其先人持橐殿
廷載舊史麟經之筆奮戈夷虜出傳家豹略之
書蓋堂構之有聞信風骨之不朽是用贈具階
官尚佇師中之錫蔚爲泉下之光

母明氏仍前封

勅曰臣子奮不顧身勤勞王事妻子不足戀惟
有母尸養之思足以奪之我有志義之臣必本
賢明之母著之女史休有譽問封太孺人某氏
乃具官某之母淑慎應圖堅貞苦節寒冰慄慄

誓白首以殉夫宿火熒熒篝青燈而教子燕及
媪寡嘗自分衣食之餘斥置義田曰以終先君
之志至於寢門之告戒必先砥節而首公日暮
而倚閭幸無以老人爲念秋高而選將當獨分
社稷之憂肆我賢臣率繇慈訓茲仍封爲太孺
人爾其優游眠食勸勉勳名旋觀東事之告成
嘗御北堂而燕喜

陝西道監察御史蔣允儀授文林郎
勅曰宋制有言在廷之臣位下而望重者惟諫
官而已朕大弊羣吏妙簡諫官試職未幾畀以

書命其慎重臺諫猶前志也具官某器資綿遠
德性溫文茂著循良再更繁劇乃膺師薦擢置
西臺蒿目憂時以四郊多壘爲恥直筆繩世以
衆言淆亂爲憂旬月之間奏章數上補助政體
皆可施行乃以覃恩授具階於戲心以御氣氣
局恢則心益小學以經世世務達則學益深惟
忠實可以不撓惟精誠可以不懈朕方觀爾之
尚勉於厥修欽哉

父弘憲原任戶部貴州清吏司署員
外郎事主事加贈奉直大夫

制曰傳稱明德之後必有達人蓋其弘長風流積習名教志氣可以默喻而濡染非有使然余有寵章表其懿德用以著教非獨廣恩原任具官贈具官某乃具官某之父恭敬溫文孝弟忠信強學博喻循道以爲經陳義本仁旌行而爲佩自膠庠而教國子以人師而爲經師歸休乎環堵之宮終天年而將母入官爲錢穀之吏盡地力以事君管權政而指掌秋毫憂存國恤賑凶裁則隨車夏雨誠感人窮至其沒不忘君可謂死以勤事肆而今子蔚有家風澹泊自將不改寒氊之雅志公忠憂國庶幾易箒之遺言清白萃於一門羽儀用乎再世是用加贈具階於戲節其一惠誠無愧鄉之先生祀於瞽宗可以教國之弟子

雲南道監察御史趙于達授文林郎

勅曰我先帝踐阼未幾舜旌斯舉除授臺諫如不終日鼎成之後接踵而來皆先帝所以遺朕也推恩之典其可後哉具官某風義篤厚器識恢明往在使垣夙有令聞英蕩相望於西北馳驅不憚夫咨訊越予嗣服之初乃就憲臺

之職雄班初滿邊事方殷風采足以肅臺端議
論足以扶國是正色對仗有獨立敢言之風奮
志車攻有滅虜吞胡之志朕甚嘉焉乃以覃恩
授具階今日方舉國憂遼遼何足憂也韓愈身
兼憲職力贊蔡州之師范仲淹起自諫官驚破
夏人之膽尊俎折衝責在爾輩爾其竟爾緒言
勿替朕命欽哉

妻王氏贈孺人

勅曰雷風順承易著家人之道琴瑟靜好詩懷
偕老之思具官某妻某氏夙有多譽來嬪德門
侍奉則總筭益虔賓祭則酒食祇飭收華永逝
遺範猶存胡不百年遂爾先封於馬鬣庶幾夙
夜尚思交儆於雞鳴茲特贈爲孺人爾其有知
尚克享此

繼妻李氏贈孺人

勅曰婦有相夫而不及其成亦有成夫而不見
其盛人能弘道末如命何具官某繼室某氏善
事君姑克相夫子篝燈佐讀有無踰仲卿之規
推食字孤有兼倍所生之感蕭然邸舍溘爾長
終不及見姑尚想彌留之慟無以聞母彌深伉

儷之悲茲特贈爲孺人庶幾芝簡之頒無復泉
臺之憾

繼妻水氏封孺人

勅曰文德無極婦道有終迨於繼續之間滋有
故新之異具官某繼室某氏德應女圖道齊師
氏作鵲巢居有之配鍾螺贏肖我之慈子皆有
逾於已生人亦莫辨其所出無復單衣之感彌
深緩帶之思至於相貳之多勤又其淑慎之餘
事茲特封爲孺人於戲鸞鳳之和鳴已徵祥於
臺閣鳴鳩之叶德尤昭美於管彤

父嵩先贈修職郎行人司行人加贈
文林郎雲南道監察御史

勅曰古稱水深土厚無逾西秦漢舉孝弟力田
多出三輔惟此良士佑彼後人趙某乃具官某
之父馴行孝謹矢志篤誠帶經而鋤空勤穠菽
於望歲釋耕而歎終期播穫於象賢惜哉有志
而無時展矣是父而是子持橐簪筆發揮青簡
之遺正色謹言藉用白茅之素是用贈具階官
用彰種德之光益厚樹人之報

母蕭氏封太孺人

勅曰古稱女士亦云母師圖史之訓具存式穀
之報不爽某氏乃具官某之母順柔以事君子
辛勤以持門戶青燈白日積有歲年黃卷素帷
互相磨切子旣躋於法從女亦蔚爲禮宗惟此
娠賢是爲胎教茲特封爲太孺人令妻壽母知
讚誦之不慙文駟雕軒將往來之有煒

福建道監察御史李思啓授文林郎

勅曰御史執憲轂下持斧郡國將命宣旨固難
其人乃者賊壘未平竝邊多警以巡行之使兼
閩外之權朕於臨遣蓋尤重焉具官某性資恢

傑風力彊明奮自循良擢居臺憲雄班初入讜
言有聞惟雲中上谷之間實藩籬要害之地命
爾相視衿要籌阨塞於屏幃之中撫馭師徒宣
國威於種落之外不徒近固鎖鑰抑可遙壯風
聲爾受命往矣乃以覃恩授具階於戲內以擁
衛神京外以警服大虜併三關而設守實有良
規兼兩道以制夷豈無長策尚勉思夫攬轡將
佇望於策勳欽哉

陝西道監察御史李達授文林郎

勅曰御史執憲轂下非徒聯法從持議論而已

其精神足以折遐衝其果毅足以扞禦侮古有
社稷臣茲其選也具官某材函特達德佩光明
筮仕祥刑蔚爲民譽峻登憲職秀出雄班頃者
東夷不臣遼疆日蹙方羽書旁午之日正戎行
單弱之時爾乃慷慨上書邁征就道逝將率巴
渝之衆簡庸蜀之人雪子弟遼水之讎正夷虜
藁街之僇有臣若此朕深歎焉乃以覃恩授具
階於戲寢淮南之謀賴汲黯之正色正淮西之
討資韓愈之昌言勿謂外寇之盛衰不係中朝
之得失朕言維服爾往欽哉

妻汪氏贈孺人

勅曰士旣通顯而念韜佩之盟未嘗不愀然也
况其賢孝有聞者乎國家蓋代爲愍之具官某
妻封孺人某氏家有素風身多儀法雞鳴問寢
則孝著慈庭蟲飛戒安則勤箴士行方宜其室
不永於年官燭宵殘嗟短檠之未棄臺霜夕冷
慨長夜之有人茲仍贈爲孺人用賁泉室之恩
式昭管彤之美

繼妻汪氏仍前封

勅曰釐降之風邈矣二女女之曰以觀刑也若

乃元妃繼室媿美虞汭以光於有家則士大夫
家難之具官某繼妻封孺人某氏圖史被躬環
珮叶德應歸妹其姊之吉良袂有占爲有齊季
女之尸采繁彌飭繼修壺政用嗣徽音問寢食
於高堂殷勤無間嚴啓閉於內屏肅穆有加茲
仍封爲孺人尚敦儆戒之風以著觀刑之範

父之章先贈文林郎浙江湖州府推
官加贈陝西道監察御史仍前階

勅曰士有奇不售坎壈長終而發其祥於後人
也俯仰之間有天道焉贈具官某乃具官某之

父器本特達才復經奇繁露玉杯湛深經術之
學雕蟲篆刻縱橫子史之文乃不偶於數奇終
自廢於狂易趙嘉之遺言臥蓐竟爾無時酈炎
之末命止戈終焉有子顧我荷橐之彥爲爾肯
構之人是用贈具階官於戲挹彼注茲亦何憾
於造物求忠移孝庶有永於前人

母方氏仍前封

勅曰婦人之殉夫也有截髮毀肌之操國家之
崇節也有崇臺綽楔之褒其有苦節有加旌門
未逮而獲以其子顯者則旌典與封典蓋交并

為封太孺人某氏乃具官某之母淑慎無儀堅
貞厲志當其夫嬰奇疾子在孤生供藥物於十
指之中熒熒宿火操門戶於一紀之內慄慄履
霜蓋殉夫於夫在之時不待寡而後寡存夫於
夫亡之後乃為窮而又窮幸藐孤之有成斬然
頭角悲未亡之後死閱此歲時真古今節孝之
所難乃功令表章之或後茲仍封為太孺人於
戲我心匪石白首何異於盛年有子克家彤管
有光於簪筆尚永傳於青史終有待於漆書
牧齋初學集卷第九十四

牧齋初學集卷九十五

外制五

吏部稽勳清吏司主事周順昌授承
德郎

勅曰昔人之舉郎吏曰真素寡欲萬物不能移
也官人之職如鏡於水澄汰自已辨論有原稱
是選者不亦難乎具官周順昌介圭不飾朱紘
有音肅然清廟之容雅有先民之度自其筮仕
司理壹意守官風清閩海之塵氣攝韶璫之魄
蔚為民譽晉陟天曹體望滋章師言惟允峭獨

自矢寅協奉公破藩籬厓岸之私虛能鑒物絕
弓劔苞苴之問廉非市名蓋將以裴王崔毛爲
心非直著簡要清通之望乃以覃恩授其階於
戲余欲拔貞固而斥華僞汝明余欲進公忠而
抑阿黨汝翼以平心考覈人地以實用儲待人
才雖在郎吏余將以統均望爾爾其念哉

妻吳氏封安人

勅曰君子砥節首公能以清彊自奮殆必有寢
門之助焉具官某妻封孺人某氏淑慎無儀安
貞有節適舅姑之所溫清無閒於夏冬竭奉養
之勞洗腆更兼乎藥物迨相夫於典劇益相誓
以御窮衣有弊穿允稱壺鹽之淡泊奩無粉澤
彌資水鏡之清明茲加封爲安人臣有義曰無
私交女有心曰無私謁斯所謂相成者乎尚益
忠勤以竟厥德

父可賢先贈文林郎福建福州府推
官加贈承德郎吏部稽勳清吏司主
事

勅曰賢才之出殆非偶然元氣孕畜於家門而
楨幹克生於王國詩有之教訓爾子式穀似之

式穀之云豈以辟咎提誨爲能事與贈具官某
乃具官某之父蘊義生風誠心爲質立身於名
教之內祖義而本仁行已在儒俠之間重氣而
輕死枕藉數卷吾伊於菽水之餘揮斥千金兀
傲於蓬蒿之下是生喆嗣爲我清郎抵掌而談
節烈之風鬚眉如在奮身以柱傾邪之俗風骨
有傳是用加贈具階官於戲鶴之在陰寧知其
子之和燕之有翼寧非厥考之詒爾無悔燾後
之勤朕益懋開先之報

母張氏加贈安人

勅曰江左之士柔靡輕心鮮有感槩砥節者非
獨士氣使然亦其鈇華浮曼之習中於胚胎而
內教不立之故也贈孺人某氏乃具官某之母
茂矩有聞樸心不改事尊章於遲暮黽勉壅鹽
安君子於遠游躬親操作是生賢子不愧母儀
如彼靜姬却丹華而不御迨於膺仕終白賁以
爲貞茲加贈爲安人於戲爾子爲清吏爲清郎
而爾爲母師爲內則豈獨可以易吳風朕將以
此教天下焉

吏部文選清吏司員外郎張振秀授

奉直大夫

勅曰唐制有言官有秩清而選妙者其選曹員外郎之謂乎頃者官方不壹吏議弘多官無一定之衡人有踐更之選稱是任者蓋尤難之具官某風規凝遠器縕閑深畿南之惠政流聞駕部之能聲茂著乃因民譽晉陟銓曹朗鑑在心虛舟應物銓敘之格已熟澄汰之途一清乃在旬月之間適當選人之闕如茅之拔幾遍於丘園積薪之流半登於啓事大破累年之留滯用昭新政之清夷朕心用嘉師言惟允乃以覃恩授其階自國論曹分銓事亦互爲甲乙詩不云乎周道如砥而乃自銓路梗塞也朕深念之爾署事有聞於以佐統均而操水鏡有餘地矣爾其懋哉

妻周氏加封宜人

制曰史稱山公之啓事于今爲法而又亟稱其內助也士之秉銓與女之秉家殆有相成者與具官某妻封孺人某氏出自冠族歸於令人効勤順於閨門則縷箴刀尺佐高寒於官署則麤糲糝鹽惟茲水鏡之清明實賴冰霜之凜冽茲

加封宜人爾夫子眉目南宮行且以啓事著也
山公夫婦不得專美於前史矣

父紹泰先贈文林郎直隸廣平府永
年縣知縣加贈奉直大夫吏部文選
清吏司員外郎

制曰士起孤生蔚爲聞人而念其親之賁志以
沒也遺書之痛有深於著存者乎朕甚愍之贈
具官某乃具官某之父學有根柢言成文章讀
書纘言有覃思草玄之苦聚徒譚道有解經不
窮之風修壹行以終身抱遺經於再世班孟堅

之撰集虎觀多本前聞賈景伯之講論雲臺悉
傳父業人歿而書在斯爲不亡身沈而名飛幸
哉有子是用加贈具階官用以著資庭之報庶
幾慰陟岵之思

母于氏加贈宜人

制曰禮稱父之遺書與母之栝椽孝子胥有所
不忍焉其不幸而兩遘之也國家有愍冊以慰
之贈孺人某氏乃具官某之母內美咸備苦節
可貞撫兩世於一絲熒熒弱息寄百口於十指
慄慄勞人式當風雨之漂搖彌見風霜之高秀

寢門聞爾悲母師之已亡綽楔歸然知禮宗之
猶在茲加贈爲宜人爾夫以孝經詔子爾之辟
耳猶是也余豈惟爾之褒將推廣移孝之義以
訓臣子

戶部廣西清吏司主事劉應遇授承

德郎

勅曰今海內多事側席須才凡吾取次登用之
人皆有經營折衝之責朕是以撫班行而歎息
臨長道而咨嗟苟得其人余何患焉具官某材
爲國楨學通世務兩更劇邑皆在中州撫勞民

則如子如傷不愛膚髮治亂國則以禽以雜罔
俾子遺觀其捨攘而又安咸以笑談而御變應
奇才異能之薦獨邁等夷緣隨牒平進之嘗再
遷郎署職司會計少試其足國之能優游度支
徐養其濟時之用乃以覃恩授具階於戲遇槃
根而加利夫豈擇官投利刃而皆虛貴乎藏器
惟深沉可以厲其氣惟閱歷可以老其材益勉
自修以需不次欽哉

父體認先贈文林郎河南河南府陝

州靈寶縣知縣加贈承德郎戶部廣

西清吏司主事

勅曰古者崇獎卓行厥有四葉表宅六闕旌門
世教下衰往往湮沒無稱而卒以發聞於後余
庸表而著之亦以佐功令之未逮也贈具官某
乃具官某之父粹和成性篤實飛聲文史蔚爲
珪璋德行仰其牆仞倚廬三載時有薑桂之滋
孺慕終身不解蓼莪之痛敬敏任恤調難阨以
睦里鄰孝友睦婣族墳墓以聯兄弟箴銘徧於
牖戶言動具有典型矢心以毋自欺不愧衾影
教子以彊爲善聿有箕裘誠可繼於先民允有
傳於後嗣是用贈具階官於戲劉氏之七葉子
能襲其餘休韋家之一經爾已疇其素志庶可
徵資庭之訓終當著博史之書

戶部江西清吏司員外郎廉第授奉

直大夫

制曰乃者軍興浩煩度支匱乏戶部諸曹郎伙
助大司農咨嗟仰屋共襄國計朕思得公忠廉
辨之臣敷歷中外者錯置子部其選甚不輕也
具官某材器含弘訥謨經遠爲令以循良播澤
廷評以詳慎流恩積有年勞擢居民部以焚絲

必理之才當賦算告窮之日精心握算佐輓輸
一時之窮高目持籌爲儲侍百年之計體望滋
茂勞勩有聞乃以覃恩授具階朕今命爾出守
河閒近在三輔征繕未已捐瘠滋多爾之字人
可以庶爾之祥刑可以教爾之司計可以富無
衣五袴之謠豈遂遜於前烈乎爾其志勤佇我
後命

父司書醫官贈文林郎大理寺右寺
右寺副加贈奉直大夫戶部江西清
吏司員外郎

制曰傳曰上醫醫國其次疾人比皆醫官也士有
抱道不試居身方伎之中比於古之醫官者與
其有以發聞於後余得表而著之累贈具官某
乃具官某之父博喻爲師束修自好慨有大志
恥爲小儒濟世於疴瘵之時自命以岐摯之業
學究原本能通三世之書澤及嫠嫠有活千人
之德再世而顯天不吾欺在昔倉公之善醫止
於有女而韓康之賣藥僅以藏名豈若斯人蔚
有譽問是用贈具階官服余書命傳之史家庶
幾療國之有人可曰良醫而無後

戶部福建清吏司員外郎鄒嘉生授

奉直大夫

制曰頃以贍軍之故大司農率其屬日夜持籌
仰屋而偷懦營私者猶蝗食鼠耗其閒良可憂
也其有公忠廉辨之士不憚拮据司我管鑰勤
勞茂著余寵嘉之爾具官某材器含弘訏謨經
遠飛華廷對展采地曹以止水不波之心爲焚
絲必理之計指畫飛輓徵輸之事憂切軍儲勾
稽秬黍會合之間勤逾家計儲侍之經費有紀
倉庾之耗蠹一清頽頽歲年籍甚聲聽乃以覃

恩授具階朕今命爾出守西安唐大曆中長安
漑田大減於漢今視唐又何如爾在戶曹留心
國計轉漕通渭成跡具在興二渠之利復陸海
之穰以佐我國計朕佇觀爾所以治秦也欽哉

禮部祠祭清吏司郎中賈允元授奉

政大夫

制曰祠祭之官舊矣它曹治事祠部治神非通
幽明窮掌故不在茲選矧朕初卽位祀事孔多
夙夜明禋其曷敢後具官某風操端直志縕清
和奉使節則咨訊有聞典屬國而贈勞無失蔚

爲民譽晉陟祠郎諳曉舊儀參酌故事寢園筵
几依然弓劔之思黜堊掃除邈矣祖宗之格執
事有恪顧吾建禮之禋曹夙夜惟寅稱此冰廳
之清選遂以覃恩授具階朕方祇承宗祀懷柔
百神率循祧廟之儀嗣舉橋山之禮近以綏孝
子而假皇考遠以寧風旱而彌裁兵惟爾忠
祀之能用致我將之頌欽哉

父應德先贈奉直大夫禮部主客清
吏司員外郎加贈奉政大夫禮部祠
祭清吏司郎中

制曰爲吾志義之臣風操端永者必其先有以
開之無基不可以厚壙肯構必始於作室理之
嘗也贈具官某乃具官某之父行無考類學有
本原辨志離經多士推爲祭酒禋躬善物與人
如飲醇醪惜哉有志而無時允矣居今而稽古
焚書逸禮若口授於坐隅矩行規言儼心思於
函丈是用贈具階官於乎賈逵悉傳父業人咸
徵家學之傳鄭衆再世儒門天亦厚遺經之報

母盧氏仍前封

制曰小雅不作而白華之詩廢也朕深念之蓋

不獨潔白之孝子不可得見而今妻壽母亦爲
斯世所希有此豈非盛世之憂與累封太宜人
某氏乃具官某之母淑慎禔身安貞應節少習
公宮之教長嫺賓祭之儀閔長寢於九京逝者
不作篝短檠於五夜遺孤有聞式看日月之輝
光彌見風霜之高秀鯢齒未艾受介福於北堂
鸞誥方迴貞寵章於南閣茲仍封爲太宜人雕
軒文駟蔚爲一世之觀便殿肩輿茂著六宮之
法

禮部主客清吏司主事虞德隆授承

德郎

勅曰朕丕承祖宗之令緒方貢充庭旅百雜
實每臨軒燕勞懷來遠人顧念春官之屬爲吾
典司客曹者其有人焉具官某韜玉渾涵斷金
通敏始流徽於劇邑旋握鑑於留曹聿有賢聲
掄於客部克勤職業諳曉舊章正小賓小客之
儀修其禮物辨五年比年之貢差其送迎贊我
秩宗典司屬國敷國恩厚僉曰汝能乃以覃恩
授具階頃者東夷不共闕我職貢咸謂以尺筮
鞭之耳然招携懷遠古有明訓誠使方夏丕平

異俗內面而吾以象胥坐制之不亦休乎尚益勤然以副予綏柔之意欽哉

妻蔣氏封安人

勅曰朕讀羔羊退食之詩蓋不惟其大夫之節儉正直表著於燕居而家人肅穆之風亦可以想見焉具官某妻封孺人某氏函貞辨族作配名家指彤管以相規惟茲靜女却丹華而不御彼美淑姬相爾令人休有華問素紗簡淡與綦組而相安粉署蕭閒喜清寒之互映茲加封爲安人服斯寵命勵彼素風無忘夙夜之勤彌表

靖共之德

父一道先贈文林郎山東青州府安

丘縣知縣加贈承德郎禮部主客清

吏司主事

勅曰昔我成祖綏靜國難治用重典時則有若理卿謙以平亭明允持法兩朝盛德之後必復其始今其子孫又以遺德發聞予寵嘉之贈具官某乃具官某之父世德作求家風綿邈內行淳備譬桃李之不言積善有餘業岐黃而濟物蔚有令聞施於後人蓋廷尉之門陰德久徵

於舊闕而比干之策祥刑茂著於後昆信哉天
不吾欺是以世濟其美是用加贈具階官於戲
無念爾祖著累朝忠厚之貽益大而家食先世
熾昌之報

母楊氏加贈安人

勅曰先王之制禮也報必有先田之祭先嗇也
川之祭先河也皆報其先也今吾臣子推恩必
先嫡母蓋亦以著教焉贈孺人某氏乃具官某
之嫡母動繇內則懋踐閭彝汲水著爲婦之勤
宿火勵相夫之志宛其死矣何以報之幸哉有
子以起家乃得從夫而分爵於戲栢捲已矣誰
興執器之悲圖像依然尚想過庭之拜義豈殊
於毛裏恩必始於本原茲加贈爲安人使知報
必有先而衆著於崇本之教豈獨慰夫逝者而
已

繼嫡母任氏加贈安人

勅曰詩人稱后妃之德必以樛木逮下爲賢而
公子之仁厚從而應焉和氣致祥亦理之恒也
封太孺人某氏乃具官某之繼嫡母性資惠明
儀法間肅敬爾夫子婉焉琴瑟之和變彼諸姬

居然娣姒之好莫辨所出祈緩帶以相從逾於
已生勤辟呷而爲教聿成子德克念母勤樹護
之慶已章宿草之恩載渥茲加贈爲安人惟此
鳴鳩之德壹以爲儀用知麟趾之仁終焉未艾

生母張氏贈安人

勅曰生母之有服也自高皇帝之著孝慈錄
始也既有服矣而厭於尊格於制而不得以推
恩人子之情猶闕如也今吾卽位需恩施及三
母不惟念所生者可以無憾抑亦可以仰副
高皇帝之德意於戲休哉某氏乃具官某之生

母有小星之德有育子之閔爾子爲令報最賤
恩二嫡而獨不得以逮爾實命不猶豈非詩人
之所歎嗟矣乎今乃以需恩及爾矣於戲愴鼓
鐘於長樂我有同悲追顧復於裏毛爾無餘憾
非此恩波之委地誰無涕淚於終天茲特贈爲
安人冀其有知尚克享此

兵部職方清吏司主事徐日久授承

德郎

勅曰頃者狡夷未平王師在野議者率以謂將
帥數易則無以振軍聲擇將不精則不可圖勝

算欲得知兵謀國之士錯置職方以參預帷幄之寄中茲選者蓋難其人具官某器縕開明風規簡直兩爲邑令廉辨有聞中更浮沉志氣不撓擢於起部再歷夏曹當羽書旁午之時兼戎事頽弛之日才猷日老揮斥於槃根閱歷之餘儲侍滋深兼綜夫衿要阨塞之故師薦惟允受事方新乃以覃恩授具階於戲用兵如用藥以療病爲成功擇將如擇醫以知人爲能事知兵而後可與謀國知將而後可與知兵此朕所以拊髀而歎也爾其勉之朕將以遼事畀汝

兵部職方清吏司主事王弘祖授承德郎

勅曰頃者禁旅單虛衛卒隕阨勾稽澄汰言者日以上聞而未有行也朕深念之安得公忠彊直十數輩參錯郎署中爲吾舉綜核之效乎具官某介圭不飾精金能割初以發硎之刃試理開封平亭閱實案無遺牘賢聲籍甚乃陟兵曹當樞庭填委職掌廢弛之日慨然修舉不辟嫌怨稽京營積年之額覈班軍累歲之餉尺籍伍符之必計而一粒一鍰之不遺今茲之事蓋爾

之有緒言而未竟者也若爾者可謂之公忠彊直之臣矣茲以覃恩授具階夫官之有分曹猶農耕之有畔無相越也爾覈汰留餘盡歸大倉不越兵事而陰有裨於計部惟其不越是以有裨夫不越之爲裨也大矣爾所舉僅有其緒引而竟之天下事可以尺幅盡也爾其懋哉

刑部浙江清吏司主事陸化熙授承

德郎

勅曰詩稱淑問如臯陶而漢通儒皆爲律令章句刑獄之事固儒者之所盡心也朕卽位以來

哀矜庶戮惟良折獄日厯於懷具官某擢秀名儒起家法署當圜土填咽之日兼法律破析之時麗附罔察請比毛舉而爾傳之經術致其忠愛諸所平反寃獄閱實疑罪參報待以削草象魏用爲縣書惟明克允時論翕然乃以覃恩授具階夫自皇祖末年以至於令刑法亦多故也然而可信者律也不敝者法也本經術以參法令此明刑弼教之本而爾之所有事也爾其懋哉朕不以文法吏蔽汝

妻夏氏贈安人

勅曰士之有賢耦猶君之有勞臣也推勸勞之意以施於臣故其閨門相貳死生契闊之故人主之愍卹及焉具官某妻某氏儀法夙嫻儉共自勵饁耕出汲辛勤於十指之中糲食穿衣顛顛於數行之側迨相夫於筮仕終約已而食貧一命未沾溘先朝露良足愍矣茲特贈爲安人於戲布素度身生不御冠帔之貴御窮沒齒死猶勤旨蓄之思我有寵章慰其永逝庶幾幽壤尚服享之

母陳氏贈安人

勅曰朕念長樂之慈愴不及養顧瞻兩宮潛然出涕發號施恩凡臣子之有母而不逮養養而不逮顯者皆與被焉不惟彝典宜然亦所以信吾悲也某氏乃具官某之母慈庭媿美內則有聞鬻子辛勤不閒螺贏之負操家黽勉備嘗荼薺之艱迨爾子旣接跡承明而爾猶沒身荆布不已悲乎今且以覃恩及爾矣於戲覩蓼蕭自葉之澤良慰我心顧蘭陔白華之養莫非人子存者不匱往者有知凡吾所以霈恩臣下者蓋亦因吾母以及人母而使天下知我念母之無

已也爾知之乎

刑部河南清吏司主事王良臣授承

德郎

勅曰在昔人主享國百年度作刑以詰四方猶曰朕言多懼朕敬于刑矧余方嗣服受王嘉師惟良折獄其敢不恣慎具官某易直子諒恭敬溫文擢穎甲科流徽宰邑回翔璧水晉陟秋曹爾以豈弟之心兼之閱實之久老於情法無毛舉它比之文致其哀矜有明刑聚教之閔副我欽恤良深歎嘉遂以覃恩授具階乃者刑罰不

衷出入時有丹書錯互奏駁紛如朕甚患之書不云乎用其義刑義殺勿庸以次汝封今之斷獄者容亦有次焉者乎爾尚益懋簡孚必卽天論毋以世輕世重爲解也朕則顯陟汝

父維城原任漢中府通判贈承德郎

刑部河南清吏司主事

勅曰朕聞世祿之家鮮克繇禮而積德之報不於其身士承家燾後能使譜牒不替耕穫有人斯可以爲賢矣原任具官某乃具官某之父世德聯綿內行淳備孝乎惟孝家巢反飼之烏友

必因心庭榮交讓之木既俛首風塵之吏益矢
心清白之遺蔚彼去思尸祝在漢岷之際蕭然
歸計風流居廉讓之間稼獵一經紹青箱於有
永箕裘再世載白石以相傳人稱別駕之功代
叶海邦之慶是用贈具階官天已錫祥刑之策
人咸瞻通德之門

母趙氏贈孺人

趙故文毅公用賢之
女

勅曰詩咏予以采蘋必曰公侯之事以其夙嫻公
宮之訓而儀則有聞也我有直臣是生淑女風
流綿邈詒於後人朕將表著之以昭彤管某氏

乃具官某之母圖頌被躬珩璜比德浴世家饋
祀之則故壺儀克肩習我君剛直之風故鉛華
不御孝睦移於姻黨廉法著於家門不及事姑
未艾陳衣之痛願然有子終如屬纊之期悵宿
莽之方滋蔚蘭蓀之競茁栝樅已矣永言內則
之芳華簪笏依然尚想外家之風烈茲特贈爲
孺人肆娠賢於再世宜媿美於千秋

刑部山東清吏司主事李自華授承

德郎

勅曰朕聞哀敬折獄惟良折獄故伯夷以降典

折民而董生用春秋決獄朕哀矜庶戮期協於
中將博求迪哲之人以副我清問之意具官某
行可標準言成文章起家循良休有譽處效能
輦轂踐更劇煩敘擢刑曹職司奏讞以廉平之
德兼明允之才欽乃攸司傳以經術期於惟刑
之恤庶幾俾獄無留乃以覃恩授具階乃者刑
罰不中出入時有要辭錯亂幾無成獄書不云
乎惟齊非齊有倫有要惟倫與要折獄之本也
爾爲法吏朕以迪哲望爾爾其敬哉

父可守原任貴州都司清平衛儒學

教授贈承德郎刑部山東清吏司主
事

勅曰蜀自漢以來代著文學文翁五經之教益
州樂職之詩弘長風流於今爲烈今吾儒碩趾
美前修有子克家顯聞於世余庸表而著之具
官某乃具官某之父含章挺生曄曄秀發強學
博喻富有英華矩行規言動應古昔遂應明經
之辟出爲鼓篋之師歸休乎環堵之宮遺子以
一經之業摩娑青簡恍疑晤對於丹鉛敬慎丹
書尚念收威於榷楚遺經不朽至德可師是用

贈具階官於戲有位於瞽宗應厥彝典爲觀於
石室視我贊書

工部都水清吏司主事金元嘉授承

德郎

勅曰司空諸曹郎惟水衡有河渠之役銜命而
出掌隄防畚鍤之事以分理行河之政而漕運
賴焉非中外敷歷夙有能聲者不在茲選具官
某擢穎制科流徽宰邑師廉平爲治之績急吏
緩民循沉實守正之風隨牒平進休有民譽著
於工曹司庫藏而鈐鍵惟嚴筦出內而棼絲必

理人地相稱人皆知水部之名出入均勞我是
有河漕之寄乃以覃恩授具階夫呂梁之渠閘
肇自平江命爾以中河爲界畫地而守爲漕政
計至殷也今東方侵梗運道戒嚴以治河寓治
兵卽以治兵兼治河斯平江之績舉矣爾無以
水曹戒越俎也朕則顯陟汝

大理寺右寺右寺副廉第授儒林郎

勅曰棘寺之設以審讞秋曹辟臺之獄其在厥
屬有炤駁番異之條參覆疑異以聽於其長非
清彊公恕積有譽望者不在茲選具官某秉心

惟允執德不回出宰疲人入報上考敘遷北寺
俾副右評豈弟有餘明習滋久平亭疑案爲之
涉筆而思訊駁爰書不以得情爲喜副我欽恤
良用歎嘉乃以覃恩授具階頃者法律破析橋
遏滋多白簡喧呶與丹書相下上書不云乎明
啓刑書胥占以刑書爲衡而胥占以權之豈惟
閱實要辭亦可以楛柱國論此棘寺之責也爾
懋勉哉朕將顯陟汝

大理寺右寺評事任國楨授文林郎
勅曰廷尉天下之平也故其屬以評爲名士非

盤桓久次老於情法居是官也欲其虛明詳慎
一底於平難矣具官某文學世家高華妙選服
官民部以清慎得名稱職度支以綜核取咎回
翔閒散流滯歲時爰自上林次於佐棘困衡旣
久求聽彌精致忠愛於罷民得情勿喜麗輕重
於疑獄有革乃孚小大以情文法無害乃以覃
恩授具階頃者吏議弘多獄辭宅比皆以失平
之故爾亦嘗涉筆而思之乎記不云乎凡制五
刑必卽天論天平之極也爾以此評刑朕亦以
此評爾敬之哉

大理寺左寺左寺副曹文衡授儒林

郎

勅曰國家於棘寺之官陳殷置輔不厭詳復至有卿貳正副之設凡以正刑書而重民命也苟非吉士豈可以稱此意哉具官某起爲國器副我廷平閒者棘寺空虛園土填咽攝官承乏夙夜勤勞寢興狃犴之閒飲食爰書之內爲民請命數上封章求補司刑以清滯獄數囹圄之困苦如在目前陳法令之敝利至於流涕雖九閻之請未克以動天而五聽之辭已孚於捨地朕

卽位以來哀矜庶獄省視故牘得爾所上書惻然歎傷有緩刑泣罪之思焉茲以覃恩授具階書不云乎蠻夷猾夏寇賊姦軌女作士爾鄉所上章論之詳矣今東隅未靖姦利交跡是朕好生之德未洽而爾之言猶信也淑問如臯陶朕深有望於爾爾其念哉

母旌表節婦常氏贈安人

勅曰國家表宅之典放於成周所以勸節也推恩之制放於唐宋所以教孝也陰教衰斲風徽寂寥我有明綸光於幽窆旌表節婦某氏乃具

官某之母佩玉德以作婦操冰心而相夫迨所
天捐棄之時正厥子孤孩之日旌心斷髮矢皓
首於盛年顧影寒燈襲白晝爲長夜乳汁枯於
襁褓血與潼俱髮膚瘁於家門淚隨聲下哺養
六尺如鵲脫而雛成促赴九京譬蛾成而蠶死
蘭儀永謝栢操有聞下報先君故知含策而入
地願然有子載聞申命之自天旋觀日月之昭
回彌見風霜之凜冽茲特贈爲安人於乎有膳
有拜業已接跡於汗青來游來觀尚亦回心於
巧白信千秋爲不偶雖百世其可知

中書舍人曹師稷授文林郎

勅曰中書省之屬掌詔勅璽書罔命之事以重
王命有事殿陛與起居載筆之臣夾立左右其
榮近爲何如哉具官某箕裘綿邈器局高凝起
自南宮升於西掖入叅侍奉出掌絲綸進止有
章溫共不改譬之有聲之玉嘗應於佩環而無
類之珠獨宜於掌握禁近之臣朕所顧視年勞
已著彌用歎嘉乃以覃恩授具階國家以秘省
儲臺諫之選使之靜諳舊章而閒習世務也問
樹而不言焚草以自晦盤桓久次而無所建明

亦或有出於此者乎官近地清優游養望此爾今日之事而非朕之所以毗爾也爾其念哉

戶部廣西清吏司主事李孔度授承

德郎

勅曰朕睠顧艱難博求弘濟蓋嘗追懷先正思譽聞於九京選建才賢庶箕裘於前烈譬之喬木古者世臣誰其似之吾有人矣具官某乃原任太子太保刑部尚書楨之子舊德深醇家風綿邈慨有大志可謂似其先人傑然羣才遂能出乎世類歷官所至皆有賢聲乃以僕丞遷於

民部職司會計搜剔蠹餘軍儲自供積弊盡掃至其奉使遼左指顧河東畫地爲圖聚關城於尺幅握奇決勝籌夷虜於目前憂國有人匡時惟允乃以覃恩授具階於乎唐雅不云乎惟西平有子惟我有臣爾先人昭事我祖公望歸然爾尚仗我多艱無忘先烈繼公忠盛大之業蔚爲寶臣在君臣父子之間庶幾盛事

妻杜氏仍前封

杜故大將軍松之女

勅曰史稱天水北地高上氣力歌謠慷慨風流猶存而婦人亦閔其君子其詩曰在其板屋蓋

亦有修我甲兵與子偕行之志焉今吾霈恩郎
吏及其室家博訪風謠激揚志義未嘗不攬秦
風而太息也具官某妻某氏歸於甲門出自將
種風範肅穆饋摯交賀於閨門姿性剛明刀劔
錯立於侍婢相爾夫子宜其室家闕狄之錫有
加素沙之德不替茲仍封爲安人嗚呼將殞大
星感風霜而痛父郎先列宿勉夙夜以戒夫義
同於羽林之孤禮當有石窳之子父子夫婦之
閒採秦風者將及焉爾其敬哉

刑部貴州清吏司郎中張光奎授奉

政大夫

制曰朕惟人才之難養之有素培之奕世用之
累朝故古之元老世臣之家必有承休濟美之
士此亦國運所繫而非獨家風使然也具官某
乃原任戶部右侍郎兼都察院右僉都御史養
蒙之子教成胄子家擅素風帷幕有聲西曹籍
甚祇承家法諳曉舊章致其忠愛之心傳以經
術之學朕以爲文法之吏安所取此蓋庶幾不
踐不履有公子仁厚之風而惟明克允得臯陶
淑問之教者歟茲以覃恩授具階惟乃烈考以

忠貞正直事我 皇祖名在國史稱爲勞臣今
爾可謂世其家矣於乎不忘舊人則有先朝弓
劍之感作求世德則有故家喬木之思覃恩及
爾朕蓋深有槩於中矣爾知之乎其有以稱

太僕寺寺丞郭夢詹授承德郎

勅曰書稱僕臣正厥后克正太僕丞貳古爲奉
車之官非家法肅明雅有風操不在茲選具官
某乃原任戶部左侍郎贈都察院右都御史諡
恭定諱惟賢之子藹然儒風蔚有家訓遂以曾
子試於奉嘗夙夜六公朝夕有恪積著年閱乃

擢是官當孟春焚牧之時正軍興選騎之日種
屯皆爲宿弊印炮徒屬虛名惟爾之能思舉厥
職乃以覃恩授具階惟乃父事我 神祖歷官
三臺懋著勞勩爾尚克念先烈無以日月叙遷
爲能事詩不云乎秉心塞淵騁牝三千爾馬官
也余故以秉心戒爾欽哉

妻俞氏封孺人

勅曰古之世家必有賢女令妻蓋其珩璜琺瑯
之防箴圖阿保之訓積習使然也余有寵命昭
于管彤具官某妻封孺人某氏武襄之子恭定

之婦恭大慈小具有儀法相夫鬻子不替勤勞
今爾夫能于其官漸致通顯則爾之爲女爲婦
可謂克舉矣茲加封爲安人惟武襄累戰立勳
誓死報國朕恒拊髀思之爾服習遺教尚有以
勸勉其夫石窳之封朕不後爾

都察院炤磨所炤磨朱大統授迪功

郎

勅曰周之詩曰無曰予小子召公是似古之人
主勸誘其世臣若家人父子之相告語也矧有
恩而不下逮朕何忍焉具官某乃東閣大學士

兼禮部尚書國祚之子蔭藉高華被服儒素爰
以任子躋于臺幕勾稽故牘職司辟藏勞于其
官執事有恪世祿繇禮朕有嘉焉乃以覃恩授
具階惟我 先帝舊學于乃父以及父詒輔余
冲人爾尚搏心屏慮以飲舊德晨昏之助有賴
于爾夫退食休沐下車里門澣衣子舍此清朝
之美談而非子弟之細事也敬之哉勿替朕命

太僕寺寺丞黃正賓授承德郎

勅曰昔我 先帝未正東朝諫諍滋煩訶譴相
逮今山陵已畢遺老日登而仗節死諫之臣若

晨星之在望追懷舊事良用愾然其有甄陞可
無書命具官某風規開敏才地清華當禁廷給
事之時正儲位殷憂之日黃扉定策尚低迴集
菀之歌丹地輸忠乃叅預伏蒲之諫騰綸闈之
削藁斜封宣播于朝堂先瑣闥以露章祕閣流
傳爲掌故肆三朝之鼎革起廿載之沉淪濺血
猶新重荷全生之德攀髯莫逮彌深狗主之思
擢爾僕丞斯爲不次乃以覃恩授具階於戲銅
龍邈矣忍誇張羽翼于先朝金馬依然尚砥礪
桑榆于末路惟端謹可以養節惟廉靜可以保

名益勉素心用章休命欽哉

妻孫氏贈安人

勅曰夫婦之誼比于賓友死生契闊詩人悲之
况乃節義相期艱難與共而中道棄捐者乎具
官某妻某氏圖頌叶矩賓祭有齊當抗章拜杖
之時厲闔門從死之志吁其悲矣命之不猶睠
兹白首以還朝尚想青衿而去國風雨如晦長
懷雞鳴儆戒之時日月光華不見翟茀以朝之
盛兹特贈爲安人服此休命慰爾幽塗

父國聘贈承德郎太僕寺寺丞

勅曰司徒鄉三物之教胥春秋月吉而從事焉
今吾臣工追命先世庸以發揮潛德弘長流風
雖出典嘗亦應邦法黃某乃具官某之父風姿
樸茂器縕純明孝友睦婣不待族師之戒敬敏
任恤無愧閭胥之書蘊義氣以生風每存亡而
生死操仁心以爲質匪剛柔而競練宜有餘休
及于厥子是用贈具階官於乎奮身抗節爾旣
伸負劍之規揭德振華余亦重緇衣之好

母王氏贈安人

勅曰朕褒旌節孝廣樹風聲凡有命辭必先勸

厲今吾臣子聿有母師風教有聞儀節茂著余
庸表德著之冊書某氏乃具官某之母婦道可
宗女圖母越毀容斷髮矢盛年以殉夫送往事
居閔餘生而教子訓誡攸著風節有聞迨乎漏
澤于賜環久已纏悲于執器嗚呼母儀邈矣永
懷風樹之淒涼臣節凜然彌想冰霜之高潔茲
特贈爲安人惟吾愍冊代彼漆書烏頭雙闕之
褒生有格于功令彤管千秋之懿終當著于頌

圖

文華殿中書房辦事大理寺右寺右

寺副汪鑣授儒林郎

勅曰簪筆之臣供奉左右歲月叙遷于國家之大計無與也具官某起家儒術給事禁庭夙夜在公溫恭有恪乃者遼左警急饋運艱難慷慨上書輸金助餉夫毀家紓國大臣之有事急病讓夷君子之所貴爾能如是豈不難哉國家之于爾也既寵之以清銜昭之以綽楔矣茲又以覃恩授具階夫卜式願輸家之半助邊公孫弘以謂宜勿許朕之寵嘉爾者蓋亦國典宜爾而非尊顯以風百姓之意也爾其敬哉

妻程氏封安人

勅曰爲吾禁近之臣溫恭朝夕必有賢明之助焉况其卓犖好義者乎具官某妻某氏機杼服勤澣濯昭儉使爾夫齊其躬以守官肥其家以輸國則惟爾之能特封爲安人不惟從夫之爵蓋亦有勸勞之義焉

父道斐贈儒林郎文華殿中書房辦事大理寺右寺右寺副

勅曰資於事父以事君而敬同故志義之臣必本諸父汪某乃具官某之父馴行孝謹被服儒

素慷慨好施百里誦德今爾子可謂有父風矣
嗚呼恥獨爲君子斯固爾之心也願俱死匈奴
豈獨子之志與是用贈具階官爾其有知當爲
默舉

母趙氏封太安人


勅曰能食能教母慈之大也立身顯親子道之
終也某氏乃具官某之母操作治家式穀訓子
觀其子之珥筆內庭而知其有晝莢之教觀其
子之輸產絕塞而知其有恤緯之忠特封爲太
安人於戲匪惟爾之褒以詔人母

牧齋初學集卷第九十五

物類集卷九十五

三十一

牛



律